

2010-mi ilassutitut aningaasaliissutininut inatsisissatut siunnersuut

pillugu

Aningaasaqarnermut Ataatsimiititaliap

ISUMALIUTISSIISSUTAA

inatsisissatut siunnersuutip aappassaaneerpeqarnerani saqqummiunneqartoq

Aningaasaqarnermut Ataatsimiititaliap ilaasortai ukuupput:

Inatsisartunut ilaasortaq Olga P. Berthelsen (Inuit Ataqtigiit), siulittaasoq

Inatsisartunut ilaasortaq Andreas Uldum (Demokraatit), siulittaasup tullia

Inatsisartunut ilaasortaq Per Berthelsen (Siumut)

Inatsisartunut ilaasortaq Juliane Henningsen (Inuit Ataqtigiit)

Inatsisartunut ilaasortaq Finn Karlsen (Atassut)

Imarisaanut nalunaarsuut:

<u>1. Aallaqqaasiut.....</u>	<u>5</u>
<u>2. Namminersornerullutik Oqartussat missingersuutaat pillugit Inatsisartut inatsisaat nr. 8, 29. oktober 1999-meersoq – missingersuusiornermut inatsit.....</u>	<u>6</u>
<u>2.1 Aningaasaleeriaatsit.....</u>	<u>7</u>
<u>2.2 Aningaasaliissuteqartarnermi tunngaviit.....</u>	<u>7</u>
<u>3. Aningaasaliissutit pillugit missingersuusiornermut inatsimmi aalajangersakkat.....</u>	<u>7</u>
<u>4. Ilassutitut aningaasaliissutinut inatsit.....</u>	<u>8</u>
<u>4.1 Aningaasaliissutit iliuitsillu oqaasertaliussatigut aalajangersakkanik tunngavillit</u>	<u>8</u>
<u>4.2 Ilassutitut aningaasaliissutinut inatsisissatut siunnersuummik saqqummiussineq.....</u>	<u>8</u>
<u>4.3 Sulianik Inatsisartuni suliaasanngorlugit innersuussisarnerit.....</u>	<u>9</u>
<u>4.4 Aningaasaliissutit inatsisitigut pisussaaffigisat isertitassatullu aningaasaliissutit.....</u>	<u>9</u>
<u>4.5 Aningaasaleeriaatsit allannguuteqartinnegarnerminni Aningaasaqarnermut Ataatsimiititaliamit akuersissutigineqartut.....</u>	<u>10</u>
<u>4.6 Maleruagassanik erseqqinnerusunik aalajangersaanissamut tunngavissat.....</u>	<u>10</u>
<u>4.7 Aningaasaliissutinik allannguinnissamik qinnuteqaateqarnissamut piumasagaatit.....</u>	<u>10</u>
<u>4.8 Ilassutitut aningaasaliissutinut inatsisip imarisai</u>	<u>12</u>
<u>4.9 Aningaasartuutunik isertitanillu nakkutilliineq.....</u>	<u>13</u>
<u>4.10 Sanaartornermut Iluarsaanermullu Aningaasaateqarfik kiisalu sanaartorneq pillugu ukiu- moortumik nassuiaat.....</u>	<u>13</u>
<u>5. Naalakkersuisut 2010-imi Aningaasaqarnermut Ataatsimiititaliamut aningaasaliissuteqarnissamik qinnuteqaataat.....</u>	<u>15</u>
<u>6. 2010-mi aningaasanut inatsit aamma 2010-mi ilassutitut aningaasaliissutinut inatsisissatut siunnersuut – kisitsisit pingaarnerit aningaasaleeriaatsinullu agguataarinerit.....</u>	<u>17</u>
<u>6.1 Kisitsisit pingaarnerit aningaasanngorlugit</u>	<u>17</u>
<u>6.2 Ilassutitut aningaasaliissutit (inatsisissatut siunnersuummi § 1) – allannguutit oqartussaasunit assigiinngitsunit pingasunit akuersissutigineqartut</u>	<u>17</u>
<u>6.2.1 Naalakkersuisut oqaasertaliussamut innersuussillutik akuersissutigisaat</u>	<u>18</u>
<u>6.2.2 Aningaasaqarnermut Ataatsimiititaliamit akuersissutigineqartut</u>	<u>18</u>
<u>6.2.3 Inatsisartut Suleriaaseq pillugu Ataatsimiititaliaannit akuersissutigineqartut.....</u>	<u>19</u>
<u>7. Oqaasertaliussanik allannguinerit (inatsisissatut siunnersuummi § 2).....</u>	<u>19</u>
<u>8. Sillimatinut kontonit 20.11.50-imit aamma 20.11.72-imit atugassiissutiginninnerit.....</u>	<u>19</u>
<u>9. Naalakkersuisut nuussinerinut Aningaasaqarnermut Ataatsimiititaliap oqaaseqaatai.....</u>	<u>20</u>
<u>9.1 Ataatsimut isigalugu.....</u>	<u>20</u>
<u>9.2 Aalajangersimasunut oqaaseqaatit.....</u>	<u>21</u>
<u>9.2.1 Sulisorisat pillugit paasissutissat.....</u>	<u>21</u>

<u>9.2.2 Naalakkersuisut kingumoortumik atuutilersumik nuussinissanik akuersissutiginninerat</u>	<u>21</u>
<u>9.3 Naalakkersuisut aningaasaliissutinik nuussineranni inatsisitigut tunngavissat</u>	<u>22</u>
<u>10. Aningaasaqarnermut Ataatsimiititaliap inatsisissatut siunnersuummut oqaatigiuma-sai allat</u>	<u>22</u>
<u>10.1 Nalinginnaasumik oqaaseqaatit.....</u>	<u>22</u>
<u>10.1.1 Sillimaffiginnissinnaasimannginnissamik inatsimmi piumasaqaat.....</u>	<u>23</u>
<u>10.2 Inatsisissatut siunnersuummi kukkunerit amigaatillu aalajangersimasut.....</u>	<u>24</u>
<u>10.2.1 Ilanngussaq 2, 2010-imut oqaasertaliussanut allannguutit.....</u>	<u>24</u>
<u>10.2.1.1 Københavni Peqqissartut Illuat nutaaq (10-498).....</u>	<u>24</u>
<u>10.2.2 Missingersuutitut ilanngussat.....</u>	<u>25</u>
<u>11. 2010-mi aningaasaliissuteqarnissamik suliassanut ataasiakkaanut oqaaseqaatit</u>	<u>25</u>
<u>11.1 AI-mi konto 89.71.40-mi aningaasaliissutinik atugassanngortitsinissaq aamma Ilulissani erngup nukinganik innaallagissiorfissamut akuersissut (10-457).....</u>	<u>25</u>
<u>11.2 Qaasuitsup Kommunanut nunap karsianit taarsigassarsiat erniaat naafferartumillu akilersornerat (10-459).....</u>	<u>26</u>
<u>11.3 Københavni Naalakkersuisunut inissiamik tunisinissaq pisinissarlu (10-464).....</u>	<u>27</u>
<u>11.4 KIIN-ip suliassa qarfiata iluani missingersuutitut iluarsissutit piviusunngortinneqarnissaat (10-475 aamma 10-479).....</u>	<u>28</u>
<u>11.5 Arctic Umiq Linemut aningaasaliissuteqaqqinnissaq pillugu qinnuteqaat (10-476).....</u>	<u>29</u>
<u>11.6 PCB eqqarsaatigalugu qulaajaalluni suliniuteqarnissamut iliuusissatullu pilersaarusiornissamut aningaasaliissutinik qinnuteqaat (10-493).....</u>	<u>29</u>
<u>11.7 Puisit amiinut ilassutitut aningaasaliissuteqarnissamik qinnuteqaat (10-503 aamma 10-515).....</u>	<u>30</u>
<u>11.8 2010-miit 2013-imut ilinniartunut inissianut pilersaarusiornissamut sanaartornissamullu atugassiinissaq (10-507).....</u>	<u>32</u>
<u>11.9 B2171, Imaneq 27-mi oqoqarnerata kingunerisaanik ilassutitut aningaasaliissutissanik qinnuteqarneq (10-509).....</u>	<u>34</u>
<u>11.10 Naatsorsueqqissaartarfimmur ilassutitut aningaasaliissutit (10-513).....</u>	<u>34</u>
<u>11.11 Qaasuitsup Kommunianni aqutsiveqarfinni Upernavimmi aamma Ummannami gasutinik annaasimasanik qalluinikkut saliisitsineq (10-516).....</u>	<u>35</u>
<u>11.12 Nanortalimmi atuartut inaannik pilersitsinermut aningaasanik nuussineq (10-521).....</u>	<u>36</u>
<u>12. Aningaasaqarnermut Ataatsimiititaliap kaammattuutai.....</u>	<u>37</u>
<u>13. Aningaasaqarnermut Ataatsimiititaliap inassuteqaatai.....</u>	<u>38</u>

Ilanngussat

- Ilanngussaq A Aningaasaqarnermut Ataatsimiititaliap 2010-mi aalajangiiffigisai Naalackersuisunit il.il. akissutunik ilallit. (Suliaq nr. 10-456 – 10-517 kiisalu 10-519 – 10-521).
- Ilanngussaq B Allaffissornikkut suliassat 2009-mi qitiusumit ingerlanneqalernerisa kingunerisaannik aningaasaliissutunik allannguinerit pillugit Aningaasaqarnermut Ataatsimiititaliamit Aningaasaqarnermut Naalackersuisumut 14. februar 2011-mi allakkat (Suliaq nr. 01.31.29-00220).

1. **Aallaqqaasiut**

Inatsisartut 2010-mi ilassutitut aningaasaliissutitut inatsisissaattut siunnersuut Aningaasaqarnermut Naalakkersuisumit Inatsisartut 2011-mi upernaakkut ataatsimiinneranni saqqummiunneqarpoq. Inatsisissatut siunnersuut siullermeerneqarami Aningaasaqarnermut Ataatsimiititaliamit suliarineqartussanngorlugu innersuunneqarpoq. Inatsisissatut siunnersuut Aningaasaqarnermut Ataatsimiititaliap suliaraa matumuunalu Inatsisartut inatsisissatut siunnersuummik aappassaaneerinissaannut isumaliutissiissuteqarluni.

Aningaasaliissuteqarnissamik qinnuteqaatit Naalakkersuisunit ukiup siuliani tiguneqartut ilaat isumaliutissiissummi matumani Aningaasaqarnermut Ataatsimiititaliamit paasisutissiissutigineqarput. Aalajangiinerit tamakkerlugit taakkunungalugu atatillugu allaqatiginnissutit isumaliutissiissummut ilanngussaq A-tut ilanngunneqarput.

Aningaasaqarnermut Ataatsimiititaliap suliaata ilaanik pingaarutilimmik taamatut sukumiisumik issuaanikkut isumaliutissiissut una Aningaasaqarnermut Ataatsimiititaliap 2010-imi ukiumoortumik nalunaarutaatut taaneqarsinnaavoq.

Isumaliutissiissutit matuma immikkoortuini 2, 3 aamma 4-mi missingersuutit pillugit inatsimmi aalajangersakkat aammalu ilassutitut aningaasaliissutitut inatsisissatut siunnersuummik saqqummiussisarnermut inatsisitigut tunngaviit ataatsimiititaliamit takussutissiissutigineqarput. Inatsisartunut ilaasortat inuillu aningaasaliissutitut inatsisinik immikkut soqutigisaqartut aalajangersakkanik pineqartunik sukumiinerusumik ilisimasaqariinngitsut immikkoortut taakku atuarnersigut aningaasanut inatsisip suliarineqartarneranik tamakkiisumik, minnerunngitsumillu ilassutitut aningaasaliissutitut inatsisip tamatumani inissisimanageranik paasinninnissaat ataatsimiititaliamit immikkut kissaatigineqarpoq. Immikkoortut ilaat ukiut siuliini isumaliutissiissutit atoqqitaapput, immikkoortorli 4.9 aamma 4.10 ukiut siuliinut sanilliullugu nutaajupput.

Aningaasanut inatsimmi 2010-mi angusassatut missingersuutigineqartumut sanilliullugu 2010-mi aalajangiinerit aningaasatigut kingunerisaat immikkoortuni 5-6-imi paasisutissiissutigineqarput.

Oqaasertaliussanut aningaasanullu inatsimmi sillimmatitut kontoni 2010-mi allannguinerit immikkoortoq 7, 8 aamma 9-mi misissorneqarlutillu naliliiffigineqarput.

Inatsisissatut siunnersuummi ajornartorsiutit, kukkunerit amigaatillu immikkoortoq 10-mi nassuaateqarfigineqarput.

Aningaasaliissuteqarnissamik suliassat 2010-mi Aningaasaqarnermut Ataatsimiititaliamit suliarineqartut tunngaviusutut isigineqartariaqarnerpaat arlallit immikkoortoq 11-mi eqikkaavigineqarput. Ukiut siuliini ajornartorsiutaasimasut isumaliutigineqarsimasullu arlallit inernilivigineqarput, taamaattumillu immikkoortoq taanna isumaliutissiissummi pingaarnerit ilaattut isigineqartariaqarpoq.

Ataatsimiititaliaq immikkoortoq 12-imi inatsisissatut siunnersuummut arlalinnik kaammattuuteqarpoq kiisalu immikkoortoq 13-imi inatsisissatut siunnersuummut ataatsimiititaliaq inassuteqaateqarluni.

Kiisalu aalajangiinerit Naalackersuisunut nassiunneqarnerat ilutigalugu takuneqarsinnaasunnngortinneqarnissaat Aningaasaqarnermut Ataatsimiititaliap anguniartaraa oqaatigineqassaaq. Taamaalillutik aningaasaliissuteqarnissamik suliassanut atatillugu Aningaasaqarnermut Ataatsimiititaliap ukiuni kingullerni aalajangiineri tamarnik www.inatsisartut.gl/Aningaasaqarnermut Ataatsimiititaliap-ip ataanni nassaassaapput. Aalajangiinerit suliap normuata aammalu Aningaasaqarnermut Ataatsimiititaliap ulloq aalajangiiffigisaata kiisalu sammineqartup ataani ilanngunneqartarput. Suliaq pillugu naammaginarumik paasissutissiisimanninneq allatigulluunniit amigaatit amerlasuutigut tunngavigalugit Aningaasaqarnermut Ataatsimiititaliap aalajangiinissaminik kinguartitsisariaqartarmat suliap normuata ataatsip ataani aalajangiinerit arlallit ilanngunneqarsinnaasarput. Taamaattumillu suliap normuata kingorna kisitsimmik allassimasoqartarpoq, tassuunakkut takutinneqartarluni suliami ataasiarluni, marloriarluni pingasoriarluniluunniit aalajangiisoqarsimasoq, soorluttaaq Aningaasaqarnermut Ataatsimiititaliap aalajangiinerata ullua nalunaarneqartartoq.

Aningaasaqarnermut Ataatsimiititaliap ataatsimiinnissani pillugit ukiumoortumik pilersaarusiortarpoq pilersaarullu taanna ataatsimiititaliap nittartagaani takuneqarsinnaavoq. Ataatsimiittarnissanut pilersaarutip Naalackersuisunit ilisimaneqarlunilu ataqqineqarnissaa ataatsimiititaliamit naatsorsuutigineqarpoq.

2. Namminersornerullutik Oqartussat missingersuutaat pillugit Inatsisartut inatsisaat nr. 8, 29. oktober 1999-meersoq – missingersuusiornermut inatsit

Inatsisartut 1999-imi ukiakkut ataatsimiinnerminni missingersuusiornermut inatsit akuersissutigaat. 2000-imi upernaakkut ataatsimiinnermi inatsimmi § 10 allannngortinneqarpoq, taamaalillunilu Inatsisartut aningaasanut inatsisaat ukiup aningaasanut inatsisip atuuffiata siuliani ulloq 15. november nallertinnagu akuersissutigineqartartussaavoq.

Missingersuusiornermut inatsisikkut missingersuusiornermi tunngaviit pioreersut aalajangersakkatigut maleruagassiunneqarput erseqqissarneqarlutillu, taakkununggalu ilaavoq Inatsisartut ukiumi aningaasanut inatsisip atuuffiani aningaasaqarnikkut tullerriiarinerata aningaasanut inatsimmi ataatsimoortumik ingerlanneqartariaqarneranik tunngavik.

- Aningaasaqarnerup naalackersuinikkut tamakkiisumik eqqumaffigineqarsinnaaneramik, aamma
- tamakkiisumik tamanut sammititamik tullerriiaarisarnissamik anguniagaqarneq aallaavigalugu taama tunngaveqarneq qitiusumik inassisimavoq.

Taamaattorli aningaasaliissuteqarnissamik pisariaqartitsilerneq aningaasanut inatsisip akuersissutigineqarnerani siumut naatsorsuutigereerneqarsinnaasimannigipat Naalackersuisut qinnuteqarnerisigut nutaanik aningaasartuuteqarnissaq Aningaasaqarnermut Ataatsimiititaliamit akuerineqarsinnaavoq. Aningaasaqarnermut Ataatsimiititaliap siusinnerusukkat aningaasaliissutigisai, *ilassutitut aningaasaliissutitut* taaneqartartut, *ilassutitut aningaasaliissutitut* inatsisikkut aalajangersaganngortinneqartarput. Tamatuma malitsigisaanik ilassutitut aningaasaliissutitut inatsit maanna tassaalerpoq kingusinnerusukkat aningaasaliissutitut inatsit, ukioq aningaasanut inatsisip atuuffia naareeraangat akuersissutigineqartartoq.

Missingersuusiornermut inatsit ulloq 1. januar 2001 atuutilerpoq, taamaattorli aalajangersakkat ilaat, soorlu sanaartugassanut iluarsagassanullu aningaasaateqarfiup pilersinneqarneranut tunngasoq aamma ilassutitut aningaasaliissuteqartarnerit pillugit aalajangersakkat ulloq 1. januar 2000 atuutilerlutik.

Aningaasaliissutit, aningaasaliissutinik allannguinerit aningaasaleeriaatsillu assigiinngitsut pillugit missingersuusiornermut inatsimmi aalajangersakkanik Inatsisartut (Naalakkersuisullu) eqqumaffinneqqullugit minnerunngitsumillu aningaasaliissutit Inatsisartut aalajangigaat ataqqineqaqqullugit missingersuusiornermut inatsimmi aalajangersakkat qitiusut ilaasa isumaliutissiissummut matumunnga aallarniutigalugit ilanngunneqarnissaat Aningaasaqarnermut Ataatsimiititaliamit pissutissaqarsorineqarpoq.

2.1 Aningaasaleeriaatsit

Missingersuusiornermut inatsisip imarai aningaasaleeriaatsit assigiinngitsut aalajangersakkatigut maleruagassiuunneqarlutillu erseqqissarneqarnerat aamma aningaasaliissutit atorneqarnissaannut maleruagassat kiisalu aningaasaliissutit nutaat allanngukkallu assigiinngitsut aalajangersakkatigut maleruagassiuunneqarnerat. *Aningaasaleeriaatsit* makkuupput:

- ingerlatsinermut aningaasaliissutit
- tapiissutitut aningaasaliissutit
- aningaasaliissutit inatsisitigut pisussaaffigisat
- sanaartornermut aningaasaliissutit, aamma
- isertitassatut aningaasaliissutit.

Missingersuusiornermut inatsisip nassataraa sanaartornermut tunngasuni sanaartugassanut iluarsagassanullu aningaasaateqarfimmik, missingersuusiornermik tunngaveqartumik pilersitsisoqarnera, tamatumalu kingunerisaanik pissutsit teknikimut tunngassuteqartut aningaasaqarnikkut sunniutaat, soorlu sanaartornerit ingerlanneqarnerisa sukkassusaasa allanngorneri aamma sanaartukkanut aningaasaliissuteqaqqinnissat pillugit apeqqutit, aningaasaliissutinut inatsisini ilanngunneqartartussaajunnaarput.

2.2 Aningaasaliissuteqartarnermi tunngaviit

Aningaasanut inatsimmi missingersuutinut ilanngussani tamani *Aningaasaliinermi tunngavigineqartut* ataanni aningaasaliinermi tunngavigineqartut erseqqinnerusumik paasisutissiissutigineqartassapput, ilaatigut:

- Aningaasaliissutit kingusinnerusukkut atugassanngortinneqarnissaat, aamma
- naatsorsuutinik inaarsaanermut atatillugu aningaasaliinermi tunngavigineqartut qanoq eqquutsinneqartigisimanerannik nalilersuisinnaanissap periarfissaqarnissaa siunertaralugu.

3. Aningaasaliissutit pillugit missingersuusiornermut inatsimmi aalajangersakkat

Missingersuusiornermut inatsimmi § 1, imm. 3-mi aalajangersarneqarpoq:

Aningaasaliissuteqarnissamik sioqqutsisumik akuersissuteqartoqareertinnagu aningaasartuuteqarnanilu aningaasanik atuisoqarsinnaanngitsoq.

§ 3-mi aalajangersarneqarpoq:

Aningaasaliissuteqarneq Naalakkersuisunut ilaasortap aalajangersakkat erseqqinnerusut malillugit aningaasanik atuinissaanut piginnaatitsissutaasoq. Naalakkersuisunut ilaasortaqa sukkulluunniit Naalakkersuisunut ilaasortaasoq Naalakkersuisoqarfimmumut pineqartumut aningaasaliissutinut akisussaavoq.

4. Ilassutitut aningaasaliissutinut inatsit

4.1 Aningaasaliissutit iliuutsillu oqaasertaliussatigut aalajangersakkanik tunngavillit

Missingersuusiornermut inatsimmi § 25 - § 29-mi aningaasaliissutit nutaat allanngortitalluunniit pillugit aalajangersakkat malittarisassiuunneqarput, taamaalillutillu *Illassutitut aningaasaliissutinut inatsimmi* aalajangersakkat tunngaviusut taakkunani malittarisassiuunneqarput. **§ 25, imm. 1-imi** aalajangersarneqarpoq

„ukiup aningaasanut inatsisip atuuffiata ingerlanerani nutaanik aningaasaliissuteqarnissamut oqaasertaliussaqarnissamullu imaluunniit aningaasaliissutinik oqaasertaliussanilluunniit allanngortitsinissamut piumasaqaataasoq Inatsisartut Aningaasaqarnermut Ataatsimiititaliaat Inatsisartut sinnerlugit akuersissuteqaqqaarsimassasoq.“

Aalajangersakkakkut tassuuna ilaatigut erseqqissarneqarpoq aningaasartuutit aningaasanut inatsimmi tunngavissaatitaasunit allaasut Aningaasaqarnermut Ataatsimiititaliaq sioqqutsisumik akuersissuteqareersimatinnagu aningaasartuutigeqqusaanngitsut.

§ 26-mi aalajangersarneqarpoq

ukiup aningaasanut inatsisip atuuffiata ingerlanerani nutaanik aningaasaliissutigineqartut oqaasertaliunneqartullu imaluunniit aningaasaliissutit oqaasertaliussallu allanngortinneqartut aningaasaliissutigineqarnermik kingorna ilassutitut aningaasaliissutinut inatsimmut ilanngunneqartassasut.

Aammattaaq iliuutsit oqaasertaliussamik aalajangersakkatigut tunngavillit ilassutitut aningaasaliissutinut inatsimmut ilanngunneqartartussaapput.

4.2 Illassutitut aningaasaliissutinut inatsisissatut siunnersuummik saqqummiussineq

§ 26, imm. 3-mi aalajangersarneqarpoq Naalakkersuisut ilassutitut aningaasaliissutinut inatsisissatut siunnersuut kingusinnerpaamik ukiup aningaasanut inatsisip atuuffiata kingorna Inatsisartut ileqquusumik ataatsimiinnissaannut siullermut Inatsisartunut saqqummiuttassagaat. Taamaalilluni pineqartoq tassaavoq aningaasaliissutaareersunut inatsit, Suleriaaseq pillugu Ataatsimiititaliap aamma Aningaasaqarnermut Ataatsimiititaliap siusinnerusukkat aalajangigaannik aalajangersakkatigut tunngavissiisoq.

Aningaasaliissutaareersunut inatsisip pineqarnerata kingunerisaanik 2010-mi aningaasanut inatsit aamma 2010-imi ilassutitut aningaasaliissutinut inatsit katillutik aningaasaliissutit oqaasertaliussallu 2008-mi atuuttut suunerinik takussutissiisussaapput. Taamaalillutik aningaasaliissutit 2010-mi aningaasanut inatsimmi aamma 2010-mi ilassutitut aningaasaliissutinut inatsimmi ilaatinneqartut, taakkunungalugu ilanngullugit sanaartugassanut tunngasuni *suliassanut aningaasaliissutit, Nunatta Karsiata 2010-mi naatsorsuutaanut aamma 2010-imi Sanaartorneq pillugu Nassuiaammumut* tunngaviupput. Nunatta Karsiata naatsorsuutai Sanaartorneq pillugu Nassuiaat Inatsisartut upernaakkut ataatsimiinneranni nalinginnaasumik saqqummiunneqartarput.

4.3 Sulianik Inatsisartuni suliassanngorlugit innersuussisarnerit

Sulianik Inatsisartut Aningaasaqarnermut Ataatsimiititaliaata arlaannik pissuteqarluni isummerfigisinnaangisaanik isummerfigiumannngisaanilluunniit peqarsinnaasarpoq, soorlu suliaq tunnga-viulluinnartumik aallaaveqarpat, aningaasartai annertuppata imaluunniit Aningaasaqarnermut Ataatsimiititaliap Inatsisartut suliaq pillugu isumaat nalornissutigippagu. Tamatumani Aningaasaqarnermut Ataatsimiititaliap suliamik Inatsisartunut suliassanngortitsilluni innersuussisinnaneranut periarfissaqarpoq. 2010-mi sulianik Inatsisartunut innersuussisoqanngilaq.

4.4 Aningaasaliissutit inatsisitigut pisussaaffigisat isertitassatullu aningaasaliissutit

Aningaasanut inatsimmi aningaasaliissutigineqartoq inatsisitigut pisussaaffigisaq ukiup ingerlanerani siunertamut tassunga aningaasartuutaajumaartutut naatsorsuutigisani sapinngisamik pitsaanerpaamik *missingiinermut* takussutissaasarpoq. Aningaasartuuteqarnissat immikkut inatsisiliani aalajangersarneqartarput, soorlu pensionisjarititassatut aningaasartuutissanut, aningaasanut inatsimmi aningaasaliissuteqarnerisq aningaasaliissuteqannginnersorluunniit apeqqutaatinnagu pensionisiaqartinneqarsinnaasunut tamanut aalajangersimasunik aningaasarta-qarlutik tunniunneqartartussanut, tunngatillugu taamaattoq.

Taamaalillutik aningaasaliissutinut inatsisitigut pisussaaffigisanut tunngatillugu aningaasartuuteqarnerussutit aningaasartuutikinnerussutilluunniit ingerlaannarlutik aningaasartuutigineqarsinnaapput ilassutitullu aningaasaliissuteqaataanissaat piumasaqaataanani. Aningaasaliissutinut naleqqiullugu allannguutit ukiumi aningaasanut inatsisip atuuffiani naatsorsuutini taamaallaat takuneqarsinnaapput.

Taamaallaat aningaasaliissutinut inatsisitigut pisussaaffigisanut naleqqiullugu aningaasartuute-qarnerussutit aningaasartuutikinnerussutilluunniit ilassutit aningaasaliissutinut inatsimmut ilanngunneqartassapput aningaasartuuteqarnerussutaasoq aningaasartuutikinnerussutaasorluunniit inatsisilianik nutaanik allanngukkanilluunniit tunngaveqaraangat aningaasaliissutigineqartorlu Aningaasaqarnermut Ataatsimiititaliamit akuersissutigineqarsimagaangat.

Aningaasanut inatsisimmi isertitassat aningaasanut inatsisissatut siunnersuutip suliarineqarnerata nalaani missingerneqartut aningaasanut inatsimmi aningaasartuutissanut killigitassanik tulleriinnilersuinermut aalajangiisooqataalluinnartarput.

Taamaalilluni Namminersorlutik Oqartussat aningaasartuutaannik ukiumoortumik ataatsimut tulleriinnilersuinerup malitsigisarpaa ukiup aningaasanut inatsisip atuuffiata ingerlanerani isertitatut aningaasaliissutit nalinginnaasumik allannguuteqassanngitsut. Allannguuteqartoqarsimassappat taakku aningaasartuutit inatsisitigut pisussaaffigisat assigalugit Nunatta Karsiata naatsorsuutaanut ilanngunneqartartussaapput.

Tamanna ima paasineqassaaq:

- Naalakkersuisut isertitatut aningaasaliissutit aningaasanut inatsimmi isertitassatut missingersuusiukkanut naleqqiullutik allanngorarneri malinnaaffigisassagaat
- Naalakkersuisut aningaasaliissutit inatsisitigut pisussaaffigisat aningaasanut inatsimmi tunngavissaatinneqartunut naleqqiullutik allanngorarneri malinnaaffigisassagaat
- taakku allannguuteqartinneqarnissaat ukiup aningaasanut inatsisip atuuffiata nalaani qinnuteqaatigineqassanngitsaq, kisiannili Naalakkersuisut taamaattoqarnera soorunami eqqumaffigisassagaat aammalu tamanna qissimigaarlugu ataatsimoortumik aningaasati-gut aqutsinertik aqqissuuttassagaat

- taamaallaat aningaasaliissutit taakku inatsisitigut allannguutininik aalajangersimasunik tunngaveqaraangata aningaasaliissutit taakku ilassutitut aningaasaliissutininut inatsimmut ilanngussat aqutugalugit aalajangersakkatigut allanngortinneqarnissaat qinnuteqaatigineqartartussaavoq.

4.5 Aningaasaleeriaatsit allannguuteqartinneqarnerminni Aningaasaqarnermut Ataatsimiititaliamit akuersissutigineqartut

Immikkoortup 4.4-p malitsigisaanik Aningaasaqarnermut Ataatsimiititaliap aningaasaleeriaatsit uku allanngortinneqarnissaat nalinginnaasumik suliarisarpaa:

- *Ingerlatsinermut aningaasaliissutit*
- *tapiissutitut aningaasaliissutit, aamma*
- *sanaartornermut aningaasaliissutit.*

4.6 Maleruagassanik erseqqinnerusunik aalajangersaanissamut tunngavissat

Aningaasaqarnermut Naalakkersuisoq maleruagassanik erseqqinnerusunik Missingersuusiornermut Malittarisassami aalajangersaasassasoq missingersuusiornermut inatsimmi § 20-imi 33-imilu ilaatigut allassimavoq.

Missingersuusiornermut Malittarisassaq atuuttoq taamani Aningaasaqarnermut Nunanullu Allanut Naalakkersuisuusumit 17. juni 2008-mi nassiuqqarpoq. Missingersuusiornermut Malittarisassaq kaajallaasitatut atuuppoq, taamaalillunilu ingerlatsivimmit saneqqunneqarsinnaanani. Aningaasaliissuteqarnissamik suliasamik suliarinninnermut atatillugu malittarisassani aalajangersakkanik saneqqutsinissaq pillugu aalajangersimasumik tunngavilersorluakkamillu Aningaasanut Naalakkersuisoq immikkut akuersissutiginnissimappat, tamanna aningaasaliissuteqarnissamik Aningaasaqarnermut Ataatsimiititaliamut qinnuteqaammi immikkut allaqqassaaq. Missingersuusiornermut malittarisassanik saneqqutsineq immikkullu akuersissuteqarneq pillugu 2008-mi ilassutitut aningaasaliissutininut inatsimmut Aningaasaqarnermut Ataatsimiititaliap isumaliutissiissutaani immikkoortoq 10.3.5 innersuussutigineqarpoq.

4.7 Aningaasaliissutininik allannguinnissamik qinnuteqaateqarnissamut piunasaqaatit

Missingersuusiornermut inatsimmi § 28, imm. 2-mi aalajangersarneqarpoq nutaanik aningaasaliissuteqartoqarnissaanik aningaasaliissutinilluunniit allanngortitsisoqarnissaanik qinnuteqaatit taamaallaat tassaassasut

- *pingaarutillit, aamma*
- aningaasanut inatsisissap suliarinerani *sillimaffigereerneqarsinnaasimannngitsunut tunngasut.*

Aalajangersagaq ima paasineqassaaq aningaasaliissuteqartoqarnissaanik tassanngaannartumik pisariaqartitsisoqalersimassasoq, tamannalu peqatigitillugu arlaatigut pingaaruteqartuussasoq. Aningaasaliissuteqartoqarnissaanik pisariaqartitsinerit aningaasanut inatsisissap suliarineqarnerani puiguismanernik taamaaqataanilluunniit tunngaveqartut imaluunniit nutaanik aningaasaliissuteqartoqarnissaanik kissaateqarnerit ukiup tulliani aningaasanut inatsisissamut utaqqinneqarsinnaasut ukiup aningaasanut inatsisip atuuffiata ingerlanerani Aningaasaqarnermut Ataatsimiititaliamut qinnuteqarnissamut tunngaviginiarneqarsinnaanngisaannarput.

§ 28, imm. 3-mi aalajangersarneqarpoq nutaanik aningaasaliissuteqartoqarnissaanik aningaasaliissutinilluunniit allanngortitsisoqarnissaanik qinnuteqaatit taamaallaat aningaasaqarnikkut iliuusissanut ukiup aningaasanut inatsisip atuuffiata ingerlanerani aningaasartuuteqarnikkut sunnuteqartussanut tunngasuussasut. Taamaalilluni Inatsisartut Aningaasaqarnermut Ataatsimiititaliaata ukiup aningaasanut inatsisip atuuffiata ingerlanerani kinguneqaataasussat kisiisa isummerfigisinnaavai, ukiunilu tullerni kinguneqaataajunnartut aningaasanut inatsisissami tullermi ilanngunneqartussaapput.

Kiisalu **§ 28, imm. 4-mi** aalajangersarneqarpoq nutaanik aningaasaliissuteqartoqarnissaanik aningaasaliissutinilluunniit allanngortitsisoqarnissaanik qinnuteqaatit paasisutissanik attuumasuteqartunik tamanik imaqartassasut, taakkunungalu ilaassallutik qinnuteqaatip aningaasaqarnikkut toqqaannartumik toqqaannangitsumilluunniit kingunerisassai pillugit paasisutissat tamakkiisut.

Ulluinnarni periusiusartut naapertorlugit Aningaasaqarnermut Naalakkersuisoq Naalakkersuisut sinnerlugit aningaasaliissutit allanngortinneqarnissaannik qinnuteqaammik Aningaasaqarnermut Ataatsimiititaliamut nassiussisarpoq. Pappialat atortussat nassiunneqartut kontonut pingaarnernut, aningaasaliissutinik allanngortitsiffiginiarlugit qinnuteqaatigineqartunut, missingersuutinut ilanngussanik imaqartussaapput.

Pisuni arlalinni missingersuutinut ilanngussat nassiunneqartut naatsuarakasiusarsimapput suliarlu pillugu illersorneqarsinnaasumik naliliinissamut periarfissaqartitsinatik. Aningaasaqarnermut Ataatsimiititaliap pappialat Naalakkersuisut namminneq najoqutaasa *Naalakkersuisut isummer-nissaannut tunngavissiat* nuutinneri tigugajuttarmagit missingersuutinut ilanngussap ilusiligaanera ataatsimiititaliap suliamik suliarinninneranut aalajangiisuusumik pingaaruteqarneq ajorpoq.

Missingersuutinulli ilanngussat allagaatini kisiartaallutik aningaasaliissutinik allannguineranut tunuliaqutaasumut nassuiaatitut ilassutitut aningaasaliissutinut inatsimmi ilanngunneqartarmata Aningaasaqarnermut Ataatsimiititaliap missingersuutinut ilanngussat kisimiillutik atuarneqarsinnaanngorlutik ilusilernerneqartarnissaat annertuumik pingaartippaa. Missingersuutinut ilanngussat Inatsisartunut ilaasortanit kikkunnullu tamanit Naalakkersuisut isummernissaannut tunngavissianik immikkuualuttunilluunniit allanik tapertaqartinneqaratik atuarneqarsinnaasariaqarput.

Paasisutissat makku missingersuutinut ilanngussami ilaatinneqartussaapput::

- Aningaasaliissutit suuneri
- aningaasaliissutit allannguutissaattut qinnuteqaatigineqartoq kr.-inngorlugu (1.000 kr.-ikkaartunut akunnaallillugu),
- allannguutissatut qinnuteqaatigineqartup kingorna ukiup aningaasanut inatsisip atuuffiata ingerlanerani aningaasaliissutit amerlassuseriligassaat pillugit paasisutissiissutit,
- allannguutissatut qinnuteqaatigineqartup nassuiarnera tunngavilersuutitaalu,
- sulisoqarnermut tunngasut allannguuteqarnissaat naatsorsuutigineqarpat tamanna paasisutissiissutigineqassaaq,
- ukiunut missingersuusiortinnut kinguneqassappat tamanna paasisutissiissutigineqassaaq,
- ingerlatsinermut sanaartukkanullu aningaasatigut toqqaannartumik aamma/imaluunniit toqqaannangitsumik kinguneqassappat tamanna paasisutissiissutigineqassaaq
- suliassami kisitsisit allannguuteqarsimappata paasisutissiissutigineqassaaq.

Taamaalilluni *allannguutissatut qinnuteqaatigineqartup nassuiarnerata tunngavilersuutitaatalu* suliap nalilersuiffiginissaanut naammattumik sukumiissuseqarnissaat pingaaruteqarpoq. Erseqqissarneqassaaq *allannguutip* aningaasanut inatsimmi tunngavissaatitaasunut naleqqiullugu qanoq ittuunera pingaarnerpaatinneqassasoq.

Kiisalu erseqqissarneqassaaq isummernissamut tunngavissiat Aningaasaqarnermut Ataatsimiititaliamit aalajangiiffigisassat tusarniaassutigineqartarneranni maleruagassat tamakkiisumik malinneqartarnissaat Aningaasaqarnermut Ataatsimiititaliamit assut pingaartinneqarmat. Tamatumani pineqarluni tusarniaavigisassat, matumanilu minnerunngitsumik Aningaasaqarnermut Naalakkersuisoqarfiup tusarniaavigineqarsimanissaat tusarniaanermullu akissutip isummernissamut tunngavissiamut ilanngunneqarsimanissaa. Assersuutigalugu isummernissamut tunngavissiap nassiunneqannginnissaata tusarniaanermut akissutini kaammattuutigineqarnera pissutigalugu tusarniaanermut akissut ilanngunneqarsinnaatinnagu tusarniaanermut akissut isummernissamut tunngavissiami oqaaseqarfigineqassaaq aammalu isummernissamut tunngavissiap Aningaasaqarnermut Ataatsimiititaliamut nassiunneqarnerani ilanngunneqarluni. Matumani immikkut malugeqquneqarpoq missingersuusinermit malittarisassami 2008-meersumi allassimammatt isummernissamut tunngavissiat Aningaasaqarnermut Ataatsimiititaliamit aalajangiiffigisassat Aningaasaqarnermut Naalakkersuisoqarfimmuut tusarniaassutigalugit nassiunneqartassat, taamaattumillu missingersuusiornermit malittarisassami aalajangersakkanik malinneqqullugit Naalakkersuisut Aningaasaqarnermut Ataatsimiititaliamit kaammattorneqarput.

Qasigiannuani efterskolimut ilassutitut aningaasaliissuteqarnissamik 2008-mi ukiakkut qinnuteqaammut atatillugu ilaatigut missingersuusiornermit inatsimmik unioqqutitsineq pillugu suliamut atatillugu uparuaaneq (Suliaq 08-370) tunngavigalugu Naalakkersuisut allaffissornikkut ataqatigiissaarinermit suleqatigiissutamik (K-gruppe) pilersitsippu¹. Ataqatigiissaarinermit suleqatigiissitamik pilersitsinermit Naalakkersuisut ataatsimiinneri il.il. pillugit kaajallaasitaq atuuttoq tunngaviuvoq. Kukkunernut efterskoli pillugu suliami paasineqartunut ataqatigiissaarinermit suleqatigiissitaq aaqqiissutitut isigineqarmat suliaassanik Aningaasaqarnermut Ataatsimiititaliamit aalajangiiffigisassanik Naalakkersuisut piareersaasiorneranni suleqatigiissitap akuutinneqarlunilu atorneqarnissaa Aningaasaqarnermut Ataatsimiititaliamit assut pingaartinneqarpoq. Naalakkersuisut inatsisissanik aningaasaliissutissanillu piareersaallutik sulinerminni ataqatigiissaarinermit suleqatigiissitaq naammattumik eqqumaffigineq ajoraat ataatsimiititaliamit arlaleriarluni paasineqarpoq, tamannalu 2010-p ingerlanerani ataatsimiititaliamit arlaleriarluni uparuarneqarpoq. Apeqqut taannarpiaq Kukkunersuiuermit Ataatsimiititaliamit suliarineqartoq ataatsimiititaliamit ilisimaneqarpoq, tamatuminnngalu iluarisimaarinninnini Aningaasaqarnermut Ataatsimiititaliap oqaatigissavaa.

4.8 Ilassutitut aningaasaliissutitut inatsisip imarisai

Ilassutitut aningaasaliissutitut inatsisip imarisarppaa inatsisip ileqqussat naapertorlugit oqaasertaa, ukununnga tunngasunik nalinginnaasumik marlunnik paragrafeqartartoq:

- *aningaasaliissutitut* allannguutaat, aamma
- *aningaasanut inatsimmi oqaasertaliussat* allannguutaat.

¹ Efterskoli pillugu suliap erseqqinnerusumik taasaqarfiginera nassuiarneralu pillugu 2008-mi ilassutitut aningaasaliissutitut inatsisissatut siunnersuutip aappassaaneerseqarnissaanut Aningaasaqarnermut Ataatsimiititaliap isumaliutissiis-sutaani immikkoortoq 10.3.5 innersuussutigineqarpoq (UPA 09/8).

Illassutitut aningaasaliissutitut inatsimmiittarpoq *Aningaasaliissutitut takussutissiaq*, ilanngussaq 1, kontonut pingaarnernut allannguuteqartunut tunngatillugu aningaasanut inatsimmi aningaasaliissutitunik, illassutitut aningaasaliissutitunik aamma aningaasaliissutitunik tamarmiusunik ilaatigut takussutissiisoq.

Taakku saniatigut illassutitut aningaasaliissutitut inatsisip imarai *inatsisip oqaasertaanut nassuiaatit*. Nassuiaatit imaraat

- *missingersuutitut ilanngussat*, illassutitut aningaasaliissutitut ataasiakkaanut tunngatillugu missingersuusiortermit tunngavilersuutitunik imallit, kiisalu
- *oqaasertaliussanut nassuiaatit*.

Taakku saniatigut illassutitut aningaasaliissutitut aningaasaleeriaatsitut agguataarneritut takussutissiaq Naalakkersuisut 2010-mi illassutitut aningaasaliissutitut inatsisissatut siunnersuutaanni ilanngunneqarsimavoq.

4.9 Aningaasartuutitunik isertitanillu nakkutillineq

Missingersuusiortermit inatsimmi kapitali 7-imi aalajangersakkat naapertorlugit Naalakkersuisut Inatsisartut ukiup aningaasanut inatsisip atuuffiata ingerlanerani aningaasaqarnikkut tamakkiisumik tulleriinnilersuinerata eqquutsinneqarnissaa qulakkeerniarlugu aningaasartuutitunik isertitanillu ingerlaavartumik nakkutilliinissartik pisussaaffigaat. Taamatutaaq Naalakkersuisut Namminersorlutik Oqartussat aningaasartuutaasa isertitaasalu nikerarneri pillugit paasisutissanik pissarsiniartarneq ingerlatitseqqittarnerlu pisussaaffigaat, taakkununnga ilanngullugit aningaasanut inatsisip tunngavilersuutitai.

Aalajangersakkat taakku malillugit aningaasaqarnikkut ingerlatsineq pillugu nalunaarut aammalu missingersuutit pillugit ilisimatitsissutit Inatsisartunut Aningaasaqarnermullu Ataatsimiititaliamut saqqummiunneqartarput.

Missingersuutit pillugit inatsit naapertorlugu missingersuutit pillugit ilisimatitsissummik ataatsimik ukiumoortumik saqqummiussinissaq Naalakkersuisut taamaallaat pisussaaffigaat. Tassani augustip naanerani missingersuutitut kisitsisit tunngaviugajuttarsimapput. 2005-imili taamani Aningaasaqarnermut Ataatsimiititaliaasup Naalakkersuisuusullu isumaqatigiissutigaaq aprilip naanerani missingersuutitut ilisimatitsissut ilanngullugu Naalakkersuisut siunissami suliarisallissagaat.

Piffissamili 2008-mi oktoberimit august 2010-mut missingersuutit pillugit Inatsisartunut ilisimatitsissusiortoqanngilaq. Tamatuma kingorna missingersuutit pillugit ilisimatitsissummik ataasiinnarmik ataatsimiititaliaq tigusaqarpoq. Aningaasaqarnermut Ataatsimiititaliamit ersarilluinnartumik naatsorsuutigineqarpoq Inatsisartut Aningaasaqarnermullu Ataatsimiititaliap (Naalakkersuisullu) atugassaannik missingersuutit pillugit ilisimatitsissutit maannamiit ingerlaavartumik akuttunngitsumillu suliarineqartallissasut, taamaaliornikkut Namminersorlutik Oqartussat aningaasaqarnerat pillugu pisariaqartumik paasisaqartoqarsinnaaqullugu.

4.10 Sanaartornermut Iluarsaanermullu Aningaasaateqarfik kiisalu sanaartorneq pillugu ukiumoortumik nassuiaat

Sanaartornermut tunngasunik aqutsinerup patajaallisarneqarnissaa siunertaralugu sanaartornermut inatsit aqqutigalugu Sanaartornermut Iluarsaanermullu Aningaasaateqarfimmik pilersitsisoqarpoq.

Aningaasaateqarfiup nassataraa sanaartornerup nikinnerata nassatarisaanik ukiut aningaasanut inatsisit atuuffiisa akornini akiliuteqartarnerit nikinneri aningaasaateqarfimmi nalimmassarneqartarnerat, taamaalillunilu aningaasanut inatsimmi aammalu ilassutitut aningaasaliissutitut inatsimmi teknikikkut iluarsiiernerit amerlasuut pinngitsoortinneqarsinnaallutik. Tamatuma peqatigisaanik pisortat sanaartugassaataasa tamakkiisut sanaartortut sanaartorsinnaassusiannut naapertuussarnissaannut periarfissat aningaasaateqarfikkut pitsaanerulersinneqarput.

Sanaartornermut Iluarsaanermullu Aningaasaateqarfik missingersuuserinermi naatsorsuuserinermilu teknikikkut aningaasaateqarfiinnaavoq Nunattalu Karsianut ilaasoq. Tassa pingaarutilinni tamani aningaasaateqarfik Nunatta Karsianut naligiisinneqarsinnaalluni, soorluttaaq aningaasaateqarfiup aningaasaatai tigorianaanaat Nunatta Karsiata aningaasaataasa tigorianaanaat ilagigaat. Tassa imaappoq; ernianit isertitat ernianullu aningaasartuutit il.il. Nunatta Karsianut nakkartussaapput Nunattalu Karsiata ernianut aningaasartuutaasa ernianillu isertitaasa sinnerinut ilanngunneqartussaallutik.

Sanaartugassanut aningaasaliissutitut aningaasanut inatsimmi aningaasartuutit ukiup naanerani aningaasaateqarfimmut nuunneqassapput, taamaalillutillu aningaasaateqarfimmi isertitatut ilanngunneqassallutik. Aningaasaateqarfiup aningaasartuutai tassaapput sanaartugassatut suliat naammassineqarneri naapertorlugit akiliutit. Aningaasartuutit Sanaartornermut Iluarsaanermullu Aningaasaateqarfiup naatsorsuutaani ilanngunneqassapput. Sanaartukkat nikinnerisa nassatarisaanik akiliuteqartarnerit nikinneri aningaasaateqarfimmi nalimmassarneqartarput.

Sanaartugassatut suliaasat taamaatinneqarnerisa kingunerisaanik aningaasartuutikinnerussutit sanaartukkaniluunniit ataasiakkaani aningaasartuutikinnerussutit allat suliaasaq inaarlugu naammassineqareerpat Nunatta Karsianut utertinneqassapput. Taamatut utertitat Sanaartornermut Iluarsaanermullu Aningaasaateqarfimmi aningaasartuutitut ilanngunneqassapput aammalu aningaasanut inatsimmi ilassutitulluunniit aningaasaliissutitut inatsimmi isertitatut ilanngunneqassallutik.

Missingersuuserinermut inatsimi § 24 naapertorlugu Naalakkersuisut Sanaartugassanut Iluarsagassanullu Aningaasaateqarfiup ingerlatai pillugit ukiumoortumik nassuiaasiortassapput. Nassuiaatip ilaatigut imarissavaa sanaartugassatut pilersaarutit ataasiakkaat killiffiannut naalunaarsuut aningaasartuutinik isertitanillu naatsorsuutitut ilanngunneqartunik imalik. Taamaalillunilu nassuiaat Nunatta Karsiata naatsorsuutaasa nalinginnaasut ilagaat. Tamannalu pissutaalluni Nunatta Karsiata naatsorsuutaasa upernaakkut ataatsimiinnermi siulermeeqarnerannut atatillugu nassuiaat Inatsisartunit nalinginnaasumik suliarineqartarsimavoq.

Sanaartornermullu Iluarsaanermullu Aningaasaateqarfik pillugu 2009-mut nassuiaat 2010-mi assut kinguartoorpoq, nassuiaallu UKA 10-p naanerani agguaatinnarneqarluni. Aningaasaqarnermut Ataatsimiititaliap paasivaa sanaartornermut nassuiaat ukioq manna aamma kinguartuussasoq, taamaalillunilu aatsaat UKA 11-mi saqqummiunneqassalluni. Taamatut ineriartortoqarnera naapertuutinnilaq, taamaalillunimi sanaartornermut nassuiaatip Nunatta Karsiata naatsorsuutaanut aammalu ilassutitut aningaasaliissutitut inatsimmut ataatsikkoortinneqarnermigut pingaarutaa annaaneqarpoq. Immikkoortut Nunatta Karsiata naatsorsuutaanut atasut maannatut upernaakkut ataatsimiinnermi naammassineqartarnissaat Naalakkersuisut anguniartariaqaraat Aningaasaqarnermut Aatatsimiititaliamit nalinginnaasumik piumasarineqarpoq. Taamaattumillu

2011-mut Sanaartornermut Iluarsaanermullu Aningaasaateqarfik pillugu nassuiaat aallarnerfigalugu nassuiaatip Inatsisartut 2012-imi upernaakkut ataatsimiinnissaannut naammassinissaa aammalu Inatsisartuni oqaluuserisassatut piffissaagallartillugu nalunaarutigineqarnissaa Naalakkersuisunit anguniarneqassasoq ataatsimiititaliap **kaammattuutigaa**.

Naggasiullugu oqaatigineqassaaq 2010-p ingerlanerani aningaasaliissuteqarnissamik sulianut arlalinnut ataatillugu Aningaasaqarnermut Ataatsimiititaliamit nalilerneqarmat sanaartugassanut aningaasaliissutit Sanaartornermut Iluarsaanermullu Aningaasaateqarfimmiittut aqunneqarnerat ilisimasaqarfineqarnerallu amigartoq. Taamaalillunilu sanaartukkanit inaarlugit naammassineqareersunit siunertamut nassaarisaniit nuussinikkut sanaartugassatut pilersaarutitut nutaanut allanngukkanulluunniit ilaatigut annertoqisunut ukiup ingerlanerani tassanngaartumik aningaasalersuisinnaaleriataarsimaneq ataatsimiititaliap pisuni arlalinni uparuarpa. Assersuutitut taaneqarsinnaavoq Pinngortitaleriffiup misissuutitut umiarsuartaassaanut aningaasaliissutinik 13 mio. kr.-inik sippuinerup taamatut nuusinikkut aningaasalersorneqarsinnaanera ataatsimiititaliap suliami 10-478-mi assut eqqumiigimmagu. Sanaartornermut tunngasuni aningaasaliissutissat nutaat ilassutitullu aningaasaliissutissat taamaaliornikkut aningaasatigut atugassiissutigineqareersut iluini aningaasalersorneqarnerat soorunami namminermit pitsaasuvoq, piffissalli sivikikannersup iluani tamatuma pisuni arlalinni ajornaquteqanngitsumik pisinnaanera tupinnarpoq allaallumi isumakulunnarsinnaalluni. Taamaattumillu sanaartugassatut pilersaarutit tamarmiusut misissoqqissaarnerisigut Sanaartugassanut Iluarsagassanullu Aningaasaateqarfik iluarsaassivigineqassasoq Aningaasaqarnermut Ataatsimiititaliamit arlaleriarluni kaammattuutigineqarpoq. Tamanna Naalakkersuisunit suli anguniarneqartariaqarpoq. Taamatut iluarsaassinermit Kukkunersuinermit Ataatsimiititaliaq siuttuutinneqarsinnaavoq, tassa suliamik tamatuminna Naalakkersuisut piaartumik namminneerlutik pisariaqartumik siuarsaangippata. Taamatut iluarsaassineq nunatta karsiata aningaasaataasa *tigoriaannaviit* amerlisarneqarnissaannut naleqqussinnaavoq, taamaaliornikkut nunani allani taarsigassarsinikkut aningaasaatit tigoriaannaat amerlineqarnissaannut pisariaqartitsineq annikinnerulersinneqalaarsinnaaqullugu.

5. Naalakkersuisut 2010-imi Aningaasaqarnermut Ataatsimiititaliamut aningaasaliissuteqarnissamik qinnuteqaataat

Nutaatut aningaasaliissuteqarnissamik aningaasaliissutinilluunniit allanngortitsinissamik, oqaasertaliussassatut siunnersuutitut kiisalu immikkut ittumik atugassiissuteqarnissamik Naalakkersuisut qinnuteqaatitut saqqummiussaata 64-it Aningaasaqarnermut Ataatsimiititaliamit 2010-imi suliarineqarput. 2010-mi ukiunilu siuliini suliat amerlassusiat takussutissiami ataaniittumi takuneqarsinnaavoq.

Ukioq	Suliat amerlassusiat
2001	66
2002	48
2003	57

2004	82
2005	69
2006	56
2007	84
2008	93
2009	58
2010	64

Suliassat aalajangiiffigisassat 64-it pineqartut Aningaasaqarnermut Naalackersuisunit tiguneqarnermik kinguninngua Aningaasaqarnermut Ataatsimiititaliamit nalinginnaasumik suliarineqartarsimapput. Pisulli ilaanni suliassaq Naalackersuisunit suliarineqarsimasoq sapaatit akunneri (qaammatilluunniit) arlallit qaangiutereeraangata aatsaat Aningaasaqarnermut Ataatsimiititaliamut nassiunneqartartoq Aningaasaqarnermut Ataatsimiititaliamit maluginiarneqarpoq. Tamanna naapertuutinnitsoq ataatsimiititaliap ukiut ingerlaneranni arlaleriaqaluni tikkuartarsimavaa. Ajornartorsiulli ukiut ingerlaneranni annikinnerulersimangilaq; allaallu akerlianik pisoqarluni.²

Suliassanit 64-init taaneqartunit 30-t (47 %-it missaata nalingi) piffissami 1. septemberimit 2010-mi decemberip naanissaata tungaanut Naalackersuisunit suliarineqarsimasut Aningaasaqarnermut Ataatsimiititaliap paasissutissiissutigisinnavaa.

2004-mi september - decemberimi suliassanit 82-init 44-t suliarineqarsimapput, tassa 54 %-it nalingi.

2005-mi september - decemberimi suliassanit 69-init 35-t suliarineqarsimapput, tassa 51 %-it nalingi.

2006-mi september - decemberimi suliassanit 56-init 30-it suliarineqarsimapput, tassa 54 %-it nalingi.

2007-mi september - decemberimi suliassanit 84-init 31-it suliarineqarsimapput, tassa 37 %-it nalingi.

2008-mi september - decemberimi suliassanit 93-init 28-it suliarineqarsimapput, tassa 30 %-it nalingi.

2009-mi september – decemberimi suliassanit 58-init 28-it suliarineqarsimapput, tassa 48 %-it nalingi.

Ukiup taamaalereernerani qinnuteqartoqartillugu aningaasat atorneqareerneranni aningaasaliissuteqarnissaq pineqartoq aarleqqutigineqarsinnaavoq. Taamaattumik ajornartorsiut taanna Naalackersuisunit suli eqqumaffigineqartariaqarpoq, missingersuusiormummi inatsit unioqqutillugu aningaasat atorneqareersut aningaasaliissutinik akuersissuteqarnissaq Aningaasaqarnermut Ataatsimiititaliamit kissaatigineqanngimmat.

Aalajangiiffigisassatut suliassat pineqartut 64-it Aningaasaqarnermut Ataatsimiititaliamit ima amerlatigisoriarluni suliarineqarput:

² IT-mut allattoqarfimmuut ilassutitut aningaasaliissuteqarnissamut atatillugu kinguartoorujussuarnermut assersuutitut takuuk suliaq 10-506. Aningaasaliissuteqarnissamut pisariaqartitsineq suliassami tassani januar 2010-mi ilisimaneqarlerpoq. Tamatuma kingorna aningaasaliissuteqarnissamik pisariaqartitsineq junip naanerani missingersuutit pillugit ilisimatitsinermi nassuiaatigineqarpoq, tamatumalu kingorna Naalackersuisut qinnuteqaammik ulloq 21. oktober akuersissutiginnippat, taannalu Aningaasaqarnermut Ataatsimiititaliamut ulloq 15. november nassiunneqarpoq. Tamanna assut naammaginangitsutut ataatsimiititaliamit isigineqarpoq.

Suliassat 49-t ataasiarluni suliarineqarput
 Suliassat 12-it marloriarluni suliarineqarput,
 Suliassat 2-t pingasoriarluni suliarineqarsimapput, aamma
 Suliassaq ataaseq Naalakkersuisunit tunuartinneqarsimalluni.

Taamaalillutik Aningaasaqarnermut Ataatsimiititaliap aalajangiineratigut Naalakkersuisulluunniit suliassamik tunuartsinerisigut suliat tamarmik naammassillugit suliarineqarput.

Suliami 10-475-imi Naalakkersuisut qinnuteqaataat Aningaasaqarnermut Ataatsimiititaliamit **itigartinneqarpoq**, aamma takuuk isumaliutissiisummi immikkoortoq 11.4. Suliat naammassineqartut sinnerini tamani Naalakkersuisut inassuteqaataat Aningaasaqarnermut Ataatsimiititaliamit akuerineqarsimapput.

Suliani arlalinni Naalakkersuisut ilassutitut aningaasaliissuteqarnissamik qinnuteqaataannik ataatsimiititaliap akuersinera suliat suussusiinik pissuteqartumik missingersuutitut ilanngussatigut³ takussutissaqartinneqartanngikkaluortoq, sulianut 2010-mi Inatsisartut Aningaasaqarnermut Ataatsimiititaliaannit akuerineqartunut missingersuutitut ilanngussat pisariaqartut 2010-mut ilassutitut aningaasaliissutitut inatsisissatut siunnersuummut ilanngunneqarsimasut Aningaasaqarnermut Ataatsimiititaliamit oqaatigineqassaaq.

Kiisalu missingersuutitut ilanngussat arlallit kukkuneqarlutillu amigaateqartut ataatsimiititaliap paasimmagu Aningaasaqarnermut Ataatsimiititaliap oqaatigissavaa. Tamanna isumaliutissiisummi kingusinnerusukkut sammeneqassaaq.

6. 2010-mi aningaasanut inatsit aamma 2010-mi ilassutitut aningaasaliissutitut inatsisissatut siunnersuut – kisitsisit pingaarnerit aningaasaleeriaatsinullu agguataarinerit

6.1 Kisitsisit pingaarnerit aningaasanngorlugit

2010-mi aningaasanut inatsimmi aamma 2010-mi ilassutitut aningaasaliissutitut inatsisissatut siunnersuummi kisitsisit pingaarnerit aningaasanngorlugit takussutissiarineqarnerat 2010-mi ilassutitut aningaasaliissutitut inatsisissatut Naalakkersuisut siunnersuutaata danskisuuani quppernemi 32 – 34-imi kalaallisuuani quppernemi 35 – 37-imi takuneqarsinnaapput, taakkulu innersuussutigineqarput.

Oqaatigineqassarli aningaasaliissutit allannguutit ilanngaattissat ilanngaatigereerlugit 35,7 mio. kr.-inik aningaasartuteqarnermik nalillit Aningaasaqarnermut Ataatsimiititaliamit 2010-mi akuerineqarmata. Tamatuma kingorna 2010-mi IST-kkut angusat **262,6** mio. kr.-inik **amigartoorfiusussatut** missingerneqarput. Matumani eqqaamasariaqarpoq *angusassatut missingersuutit* inaarutaasumillu *naatsorsuutitigut angusat* assigiinngimmata. 2010-mi inaarutaasumik naatsorsuutitigut angusat 2010-mi Nunatta Karsiata naatsorsuutaanni, Inatsisartut upernaakkut ataatsimiinneranni saqqummiunneqarlutillu siullermeerneqartussatut naatsorsuutigineqartumi takuneqarsinnaapput.

6.2 Ilassutitut aningaasaliissutit (inatsisissatut siunnersuummi § 1) – allannguutit oqartussaasunit assigiinngitsunit pingasunit akuersissutigineqartut

³ Soorlu taamaappoq suliani isumaqatigiissuteqarnissamut pigisamilluunniit soorlu illuutimik tunisinissamut Naalakkersuisunit ilaasortaqaq ataatsimiititaliamit piginnaatinneqarsimatillugu.

Inatsisissatut siunnersuummi ilaapput ilassutitut aningaasaliissutit ukuninnga akuersissutigineqartut

- Naalakkersuisunit, oqaasertaliussanik innersuussinikkut
- Inatsisartut Aningaasaqarnermut Ataatsimiititaliaannit
- Inatsisartunut/Inatsisartut Suleriaaseq pillugu Ataatsimiititaliaannit

Aningaasaliissutit allannguutaat aalajangersimasut *Aningaasaliissutitut takussutissiami*, inatsisissatut siunnersuummi *ilanngussaq 1-imi*, takuneqarsinnaapput. Allannguutit ataasiakkaat *missingersuutitut ilanngussartaqarput*, taakkunanilu allannguutit erseqqinnerusumik nassuiarneqarput. *Ilanngussaq 1-imi* taamatullu *missingersuutitut ilanngussani* takuneqarsinnaassaaq Aningaasaqarnermut Ataatsimiititaliaq Naalakkersuisulluunniit aningaasaliissutit allannguisoqarnissaanik qanga akuersisimanersut suliarlu sorleq pineqarnersoq.

6.2.1 Naalakkersuisut oqaasertaliussamut innersuussillutik akuersissutigisaat

Oqaasertaliussat tunngavigalugit aningaasaliissutit nuussinerit amerlasuut Naalakkersuisunit akuersissutigineqarput. Nuussinerit takku ilanngaattissat ilanngaatigereerlugit missingersuutitut sunniuteqanngillat. Ingerlatsinerimut tunngasuni nuussinerit amerlanerpaartaat suliaasaqarfiit allanngornerinik pissuteqarput.

Naalakkersuisut aalajangiineranni tunngavissaatitaasut eqquutsinneqarsimanersut Aningaasaqarnermut Ataatsimiititaliaq erseqqinnerusumik naliliiffigisimavaa. Isumaliutissiissutit immikkoortuani 9.3-mi allassimasut innersuussutigineqarput.

6.2.2 Aningaasaqarnermut Ataatsimiititaliamit akuersissutigineqartut

Ingerlatsinerimut aningaasaliissutit

Ingerlatsinerimut aningaasaliissutit allannguinerit ilanngaattissat ilanngaatigereerlugit 58,4 mio. kr.-inik nalillit Aningaasaqarnermut Ataatsimiititaliamit akuersissutigineqarput.

Tapiissutitut aningaasaliissutit

Tapiissutitut aningaasaliissutit allannguinerit ilanngaattissat ilanngaatigereerlugit -29,8 mio. kr.-inik nalillit Aningaasaqarnermut Ataatsimiititaliamit akuersissutigineqarput. Tassa missingersuutit pitsanngoriarnerat.

Aningaasaliissutit inatsisitigut pisussaaffigisat

Siusinaartumik pensionisiantut aningaasaliissutit amerlineqarnerat tunngavigalugu aningaasaliissutit inatsisitigut pisussaaffigisanik allannguinerit ilanngaattissat ilanngaatigereerlugit 10,2 mio. kr.-inik nalillit Aningaasaqarnermut Ataatsimiititaliamit akuersissutigineqarput. Tamatuma saniatigut aningaasaliissutit inatsisitigut pisussaaffigisanik allannguissamik akuersissuteqartoqanngilaq, tamannalu missingersuusiornermut inatsimmi § 27-imut naapertuuppoq

Isertitassatut aningaasaliissutit

Isertitassatut aningaasaliissutinik allannguissamik Aningaasaqarnermut Ataatsimiititaliaq 2010-mi -4,6 mio. kr.-inik akuersissuteqarsimavoq. Isertitassatut aningaasaliissutinik allannguisoqartillugu aningaasanut inatsimmi aningaasartuutissatut atugassiissutigineqartut Inatsisartut ataatsimoortumik pingaarnersiunerannik ersiutaanissaat sukkuulluunniit aalajangiusimaneqartuartaqarpoq, tak. missingersuusiornermut inatsimmi § 5. Isertitassatut aningaasaliissutit 2010-mi akuerineqartut tunngaviusumik maleruagassamut tassunga akerliusutut isikkoqanngillat.

Sanaartugassanut aningaasaliissutit

Sanaartugassanut aningaasaliissutinik allannguissamik qinnuteqaatit ilanngaattissat ilanngaatigereerlugit 1,5 mio. kr.-inik nalillit Aningaasaqarnermut Ataatsimiititaliamit akuersissutigineqarput.

6.2.3 Inatsisartut Suleriaaseq pillugu Ataatsimiititaliaannit akuersissutigineqartut

Ilassutitut aningaasaliissuteqarnissamik qinnuteqaatinik Suleriaaseq pillugu Ataatsimiititaliaq ukioq manna akuersissutiginninngilaq.

7. Oqaasertaliussanik allannguinerit (inatsisissatut siunnersuummi § 2)

Oqaasertaliussat arlalissuit inatsisissatut siunnersuummi ilanngunneqarsimapput. 2010-mi aningaasanut inatsimmi oqaasertaliussat taakku taamaaqataat oqaasertaliussanit akuersissutigineqartunit taarserneqarput/ilassuserneqarput.

Oqaasertaliussanut nassuiaatit tamakkiisuunnginnerat Aningaasaqarnermut Ataatsimiititaliaq ukiut siuliini tikkuavigereerpaa. Tamanna tunngavigalugu oqaasertaliussanut nassuiaatit ataatsimut isigalugu paasissutissiinerulersimanerat ataatsimiititaliamit nuannaarutigineqarmat oqaatigineqassaaq.

Oqaasertaliussalli allanngortinneqarnissaannik qinnuteqarnissaq *sooq* pisariaqarnersoq pillugu paasissutissat ersarissut nassuiaatini saqqummiunneqartariaqarnerat erseqqissassallugu ataatsimiititaliaq ukiut siuliinisulli pisariaqarsoraq. Pisut amerlanerpaartaanni paasissutissat taakku amigaataapput.

8. Sillimmatinut kontonit 20.11.50-imit aamma 20.11.72-imit atugassiissutiginninnerit

2010-mut aningaasanut inatsit kontomi pingaarnermi 20.11.50-imi ingerlatsinermut sillimmatinik 10,0 mio. kr.-inik ilaqartillugu akuersissutigineqarpoq. Ingerlatsinermut sillimmatit tigusiffigineqarnissaat/ilaneqarnissaat 2010-mi tallimariarluni akuersissutigineqarsimavoq, tamatumalu kingorna 31. december 2010-mi 0 kr.-it sinnerussimallutik. Taamaalillutillu ingerlatsinermut sillimmatit ilanngaaseereerluni 10,0 mio. kr.-inik 2010-imi tigusiffigineqarsimapput.

Assersuutitut taaneqarsinnaavoq 2009-mut aningaasanut inatsit 20,0 mio. kr.-inik ingerlatsinermut sillimmatitaqartillugu akuersissutigineqarmat. Ingerlatsinermut sillimmatit tigusiffigineqarnissaat/ilaneqarnissaat 2009-mi sisamariarluni akuersissutigineqarsimavoq, tamatumalu kingorna kontomi 31. december 2009-mi 10,3 mio. kr.-it sinnerussimallutik.

Kiisalu 2010-mut aningaasanut inatsit illoqarfiit nunaqarfiillu ilaanni immikkut ittumik suliniutinut, matumani minnerunngitsumik suliffissaqartitsinermut, ilinniartitaanermi suliniutinut il.il. atugassaanik immikkut sillimmatinik 15,0 mio. kr.-inik ilaqartillugu akuersissutigineqarpoq. Aningaasat kontomi pingaarnermi 20.11.72-imi immikkoortinneqarput. Kontomit pingaarnermi 1 mio. kr.-it atugassiissutigineqarnissaat kisimi akuerineqarsimasoq inatsisissatut siunnersuutip aningaasaliissutinut takussutissiartaani allassimavoq. Tamannali eqqunngilaq, tassami Arctic Green Foodip aamma Sisimiut Fish Aps-ip isumaqatigiissuteqarfigineqarnissaat Aningaasaqarnermut Ataatsimiititaliap suliami 10-466-mi aamma 10-467-mi akuersissutigimmagu, siunertamut tassunga kontomit pingaarnermi 20.11.72-imit toqqaannartumik aningaasartuuteqarnissaq ataatsimiititaliamit akuersissutigineqarluni. Aningaasat taakku ingerlatsinermut kontomut imaluunniit tapiissutitut kontomut nuunneqarsimasuuppata, tassanngaannillu aningaasat siunertamut qinnuteqarnek naapertorlugu atorineqarsinnaanerit eqqornerusimassagaluarpoq.

Kontomit pingaarnermi 20.11.72-imit katillugit 3,375 mio. kr.-it atorineqarnissaat suliani marlunni siuliani taaneqartuni ataatsimiititaliamit akuersissutigineqarmat Aningaasaqarnermut Ataatsimiititaliamit paasissutissiissutigineqarsinnaavoq. Taamaattumillu kontomi pingaarnermi 31. december 2010-mi 11,625 mio. kr.-it sinnerussimanissaat ilimagisariaqarpoq.

Aningaasat qanoq amerlatigisut pineqartut eqqarsaatigigaanni sillimmatinut kontomit aningaasalersugaasunik suliniutinik nutaanik piviusunngortitsineq aallartitsinerlu missingersuusiornermut inatsimmi § 5, ukiumi aningaasanut inatsiseqarfiusumi Inatsisartut aningaasaqarnermik ataatsimoortumik tulleriarinerannik aningaasanut inatsisip ersersitsisuunissaanik aalajangersaasoq, naapertorlugu pissasoq Naalakkersuisunut taamatullu Inatsisartunut ilaasortanut eqqaasitsissutigeqqissallugu pisariaqarsorinarpoq.

Tamatuma saniatigut Namminersorlutik Oqartussat aqutsivianni piviusorsiorlumik missingersuusiortarnissamut missingersuutinillu malitseqartitsisarnissamut kajumilersitsinissaq pisariaqartoq qulakkeerneqarsinnaaqqullugu sillimatitut aningaasaliussat aallaavittut isigalugu sapinngisamik killeqartinneqarlutillu siunertamut aalajangersimasumut immikkoortinneqartariaqarnerat siornatulli Aningaasaqarnermut Ataatsimiititaliamit oqaatigineqassaaq.

9. Naalakkersuisut nuussinernut Aningaasaqarnermut Ataatsimiititaliap oqaaseqaatai

9.1 Ataatsimut isigalugu

Aningaasanut inatsimmi oqaasertaliussat aammalu oqaasertaliussat, Aningaasaqarnermut Ataatsimiititaliamit kingusinnerusukkut akuersissutigineqartut 2010-milu ilassutitut aningaasaliissutinut inatsimmi ilanngunneqartut naapertorlugit kontot pingaarnernit assigiinngitsut kiisalu sanaartornerup iluani suliassat akornanni nuussinissanut Naalakkersuisut piginnaatinneqarput.

Nuussinissat akuersissutigineqarsimatillugit aningaasaliissutinik allannngortitsinerit pinerit tamaasa inatsisissatut siunnersuummi aningaasaliissutinut takussutissiap, ilanngussaq 1-ip, immikkoortortaani (kolonne) ilanngunneqartarput. Missingersuutinut ilanngussani nuussinernut tunngavilersuutit aammalu Naalakkersuisut ulloq akuersissutiginniffiat allassimassapput. Kiisalu oqaasertaliussat, nuussinissamut tunngaviliisuusut pillugit paasissutissat nalunaarneqassapput.

Missingersuutininut ilanngussat taakku Aningaasaqarnermut Ataatsimiititaliap misissorpai, tamannalu tunngavigalugu missingersuutininut ilanngussat paasissutissiilluartuunissaasa qulakkeerneqarnissaanik pingaartitsinerminnik ingerlatsiinnarnissaanik Naalakkersuisut kaammattorlugit.

9.2 Aalajangersimasunut oqaaseqaatit

9.2.1 Sulisorisat pillugit paasissutissat

Missingersuutininut ilanngussani arlalinni allannguutissatut akuersissutigineqartut *Sulisorisassatut naatsorsuutigisat*-nut kinguneqaatissaat pillugit paasissutissat tutsuiginartut aamma ukioq manna amigaataaqpput. Pisut ilaanni paasissutissat taakku amigaataaalluinnarput, ilaannilu *sulisorisatigut allannguutit pinnagit* atorfiit allannguutaat aalajangersimasut nalinginnaasumik paasissutissiissutigineqartarsimallutik.

Missingersuusiornermut malittarisassami 2008-meersumi immikkoortoq 5.2 Aningaasaqarnermut Ataatsimiititaliamit aamma innersuussutigineqassaaq, tassani sulisorisassatut naatsorsuutigisat taakkulu naatsorsorneqartarnerat pillugit paasissutissiissuteqarnissamut Naalakkersuisut najoqqutassanik pitsaalluinnartunik aalajangersaasimapput.

Sulisorisassatut naatsorsuutigisat pillugit paasissutissat eqqortuugaluarpata 2010-mi aningaasanut inatsimmi takussutissiat *sulisorisassatut naatsorsuutigisat* pillugit paasissutissanik imallit nutarterneqarsinnaassagaluarput. Taamaaliornikkut 2010-mi naatsorsuutininut tunniussinermut atatillugu *Sulisorisassatut naatsorsuutigisat sulisorisatut atorneqarpiartununut* sanilliuqqarnissaat periarfissaqalissagaluarpoq.

Suliffiit aalajangersimasumik amerlassusilikkat pineqannginnerat erseqqissarneqarsinnaaqqullugu aningaasaliissutinut inatsisissani aggersuni sulisorisassatut naatsorsuutigisat pillugit takussutissiani ukioq naallugu sulisorisat atorneqartalernissaat ataatsimiititaliap ukioq manna aammaarluni **siunnersuutigissavaa**. Taamaaliornikkut kukkuneq taanna ajoraluartumik nalinginnaaqisoq killilersimaarneqarsinnaassagaluarpoq.

9.2.2 Naalakkersuisut kingumoortumik atuutilersumik nuussinissanik akuersissutiginninnerat

Malittarisassatut pingaarnertut isigalugu kingumut atuutilersussanngorlugit nuussinissat akuersissutigineqartannginnissaat, taamaattoqartillugulu aningaasat atorneqareerneranni akuersissutiginnittoqartannginnissaa qulakkeerneqartassasoq Aningaasaqarnermut Ataatsimiititaliap Naalakkersuisunut ukiut arlallit ingerlanneranni kaammattuutigisarpa. Taamaallilunilu missingersuutininut qaangiinissaq taama ersaritsigitillugu ukiumi aningaasanut inatsisip atuuffiata naalernerani nuussinereit ingerlanneqartariaqanngillat. Tassunga taarsiullugu missingersuutininut qaangiinnermut pissutaasoq nunatta karsiata naatsorsuutaanut atatillugu naatsorsuutininut nassuiaatini ersarissarneqartariaqarpoq.

Aningaasaqarnermulli Ataatsimiititaliaq 24. januar 2011-mi (Suliaq nr. 01.31.29-220) allakkakkut ilisimatinneqarpoq 2010-p aallartinneranut kingumoortumik atuutilersumik aningaasaliissutinik nuussinissat arlallit 2010-mi aningaasanut inatsimmi pisinnaatitsissut aqqutigalugu Naalakkersuisunit ulloq 20. december 2010-mi akuersissutigineqarsimasut. Allaffissornikkut suliaq, tassunga ilaatigut ilanngullugit naatsorsuuserinermik suliaq qitiusumit

ingerlanneqalernerat 2009-mili piviusunngortinneqartoq nuussinernut tunuliaqutaavoq. Tamanna Aningaasaqarnermut Naalakkersuisumut ulloq 14. februar 2011-mi allagaqarnikkut Aningaasaqarnermut Ataatsimiititaliamit immikkut uparuarneqarpoq. Allakkat isumaliutissiissummut uunga **ilanngussaq B**-tut ilanngunneqarput. 2009-mi ilassutitut aningaasaliissutitut inatsimmut isumaliutissiissummi kaammattuutigineqartup assinganik ilassutitut aningaasaliissutitut inatsisunut isumaliutissiissutini ukiuni arlalinni ataatsimiititaliap kaammattuuteqartarsimanera tunngavigalugu Aningaasaqarnermut Ataatsimiititaliap uparuaanera isigineqassaaq:

”Kaammattuut nr. 1

*Kingumut atuutilersussanngorlugit nuussinissat malittarisassatut pingaarnertut isigalugu akuersissutigineqartannginnissaannik Aningaasaqarnermut Naalakkersuisoq Aningaasaqarnermut Ataatsimiititaliamit **kaammattorneqarpoq**. Aningaasaliissutitut allannguinnissamik akuersissuteqartoqassatillugu aningaasat atorneqareerneranni akuersissuteqannginnissaq pinerit tamaasa qulakkeerneqartariaqarpoq.”*

Tamanna tunngavigalugu kaammattuut aallarniutigalugu taaneqartoq Aningaasaqarnermut Ataatsimiititaliamit uteqqinneqassaaq. Tamatuma saniatigut kontot pingaarnertit erseqqilluinnartumik qaangiiffiusussat nunatta karsiata naatsorsuutaasa kusassarneqarnissaat siunertariinnarlugu aningaasaliissutitut ukiup naalernerani nuussiffigineqartannginnissaannik Naalakkersuisut ataatsimiititaliamit **kaammattorneqarput**. Missingersuusiornertut inatsit naapertorlugu aningaasaliissutitut qaangiinissap (taamaalillunilu inatsimmik unioqqutitsinissap) pinngitsoortinniarnissaanut Naalakkersuisut pisussaaffeqarnerat, taamaalillutillu aningaasaliissutitut atuivallaarnissaq pinngitsoorniarlugu oqaasertaliussani nuussinissamut piginnaatitsissutitut Naalakkersuisut atuinissaat ataatsimiititaliamit soorunami akuersaarneqarpoq. Ukiulli naalernerani taama nuussinerit immikkoortortani aningaasaqarnermik aqutsinerup nunatta karsiata naatsorsuutaani eqqortumik takutinneqanngitsoorneranut peqataaqataasinnaapput, taamaaliornikkullu aningaasaqarneq piffissaagallartillugu iliuuseqarfigineqanngitsoorluni. Tamatuma saniatigut naatsorsuutitut taama kusassanerup nassatarisarpaa nunatta karsiata aningaasaataanik ukiumut aggersumut aningaasanut inatsisissamut Inatsisartut missingersuusiornertit pingaarnersiullutillu tulleriiaarnerit pisariunerulernerat. Taamaattumik pisuni taamaattuni aningaasaliissutitut nuussinnaatitaanerminnik Naalakkersuisut atuinaveersaartariaqartut tassungalu taarsiullugu nuussinissaq pillugu qinnuteqaammik Aningaasaqarnermut Ataatsimiititaliamut saaqqummiussisariaqartut Aningaasaqarnermut Ataatsimiititaliap isumaqarpoq.

9.3 Naalakkersuisut aningaasaliissutitut nuussineranni inatsisitigut tunngavissat

Inatsisitigut tunngavissaatitut naapertorlugit Naalakkersuisut nuussinerit pisimanersut Aningaasaqarnermut Ataatsimiititaliamit erseqqinnerusumik naliliiffigineqarsimavoq. Immikkoortoq 9.2.2-mi aamma 9.2.3.-mi allassimasut eqqaassanngikkaanni ataatsimut isigalugu pissutsinik tamatumunnga naapertuutinngitsunik ataatsimiititaliap nalaataqarsimanngilaq.

10. Aningaasaqarnermut Ataatsimiititaliap inatsisissatut siunnersuummut oqaatigiumasai allat

10.1 Nalinginnaasumik oqaaseqaatit

Aallaqqaasiutigalugu isumaliutissiisummi immikkoortoq 5 innersuussutigineqarpoq, tassani suliat amerlassusiat, qinnuteqaatinik Aningaasaqarnermut Ataatsimiititaliap suliarinninnerata ineneri naapertorlugit agguataakkamik nalunaarsorneqarsimallutik.

Tamatuma saniatigut ilanngussaq A innersuussutigineqassaaq, tassani Aningaasaqarnermut Ataatsimiititaliap ukiumi qaangiuttumi aalajangigai tamakkerlutik suliap normukkaarlugit ilangunneqarsimapput. Aalajangiinerni arlalinni annertunerusumik paasissutisseeqqullugit missingersuutinulluunniit ilanngussamik nutaamik nassiusseqqullugit Naalackersuisut ataatsimiititaliamit qinnuigineqarsimapput. Taakkuttaaq pisariaqartillugu aalajangiinernut ataasiakkaanut kingullinngorlugit ilanngunneqarput.

Nuussinissat Naalackersuisut namminneq akuersissutigisaat immikkoortup siuliani Aningaasaqarnermut Ataatsimiititaliamit sammineqarput. Ajoraluartumik oqaatigineqassaaq kukkunerit naapertuutinngitsullu arlallit missingersuutinut ilanngussani Naalackersuisunit akuersissutigineqartuni nassaassaasut missingersuutinut ilanngussani Aningaasaqarnermut Ataatsimiititaliamit akuersissutigineqartuni aamma nassaassaammata. Tassunga atatillugu oqaatigineqassaaq aningaasaliissutinik allannguinissat aalajangersimasut ataatsimiititaliamit akuersissutigineqarneraangata imaanngimmat missingersuutinut ilanngussat ilassutitut aningaasaliissutinut inatsimmi ilanngunneqartussat Aningaasaqarnermut Ataatsimiititaliamit akuerineqartut.

Taamaalillunilu ilaatigut ilusiligaanermikkut inissitsiterneqarnermikkullu assigiissarneqarnissaasa kiisalu aningaasaliissutinut tunngasut nassuiarneqarnerisa pitsaasuunissaasa qulakkeerneqarnissaat siunertaralugu missingersuutinut ilanngussat ilassutitut aningaasaliissutinut inatsimmi ilanngunneqannginneranni Naalackersuisunit misissorneqartarnissaat Aningaasaqarnermut Ataatsimiititaliamit nalinginnaasumik naatsorsuutigineqarpoq. Inatsisissatut siunnersuutip Naalackersuisuneersup pitsaasuunera sukumiisumik misissorneqarsimassasoq naatsorsuutigineqartariaqarpoq.

Suliami paasissutissat amigarpallaarnerat pissutigalugu Naalackersuisut qinnuteqaataannik suliarinninnini Aningaasaqarnermut Ataatsimiititaliap pisut ilaanni kinguartittarsimavaa. Naalackersuisut isummernissaannut tunngavissianik assigisaannilluunniit atortoqarani atuarneqarsinnaaqqullugit missingersuutinut ilanngussat tamakkiisuunissaat Naalackersuisunut eqqaasitsissutigissallugu ataatsimiititaliap pisariaqarsoraa.

10.1.1 Sillimaffiginnissinnaasimannginnissamik inatsimmi piumasaqaat

Ataatsimut isigalugu ukiumi qaangiuttumi aningaasaliissuteqarnissamik suliassat tunngavigalugit missingersuusiornermut inatsimmi § 28, imm. 2-p ataqqineqarnissaata erseqqissarneqarnissaa pisariaqarsorinarpoq. Aalajangersakkakut aalajangersarneqarpoq nutaanik aningaasaliissuteqartoqarnissaanik aningaasaliissutinilluunniit allanngortitsisoqarnissaanik qinnuteqaatit taamaallaat aningaasaqarnikkut iliuusissanut *pingaarutilinnut* aammalu aningaasanut inatsisissap suliarinerani *sillimaffigereerneqarsinnaasimannngitsunut* tunngasuusassat.

Nassuerutigineqartariaqarporli 2010-mi aningaasaliissuteqarnissamik suliassanut arlalinnut tunngatillugu aalajangersagaq taaneqartoq pisariaqarneratut tamakkiisumik malinniarneqarsimanersoq nalorninarmat.

IT-leriffimmut 5 mio. kr.-ingajannik ilassutitut aningaasaliissuteqarnissaq Naalackersuisut taamaalillutik suliaq 10-506-imi qinnutigaat. Namminersorlutik Oqartussat atortuisa it-lerinermilu periutsit tunngaviusut ingerlatsinermi pilersuisumit nutaamit tiginerannut atatillugu aningaasartuuteqarneq aningaasaliissuteqarnissamik pisariaqartitsilernermit pissutaarpiartoq qinnuteqaammi allassimavoq, tamannalu januar/februar 2010-mi 4,689 mio. kr.-inik aningaasartuuteqarnerunermik nassataqarpoq. Aningaasaliissuteqarnissamik pisariaqartitsineq taama annertutigalunilu imartutigisoq kiisalu pingaarnertut periutsinut tunngasumik aalajangiineq aningaasartuuteqarnissamik pisariaqartitsinermit tunuliaqutaasoq 2010-mi novemberip naanerani – tassa qaammatip aappaata qeqqata missaa sioqqullugu – 2011-mi aningaasanut inatsisissap akuersissutigineqarnerani ilisimaneqarsimannginnissaat ilimanangilaq. Taamaalillunilu Nunatta Karsiata 2010-mut naatsorsuutai pillugit isumaliutissiissummini suliaq taanna Kukkunersiuinermit Ataatsimiititaliap tikikkumaaraa ilimanarpoq.

Assersuutissaq alla tassaavoq suliaq 10-485, tassani Kangerlussuarimi mittarfeqarfiup inaarneqarnissaanut aningaasanik qulakkeerinissaq siunertaralugu sanaartugassanut aningaasaliissutinik katillugit 5 mio. kr.-it sinnilaarlugit nalilinnik nuussinissaq Naalackersuisut ulloq 30. juni 2010-mi qinnutigaat. Ataatsimiititaliap aalajangiinissaanut isummernissamut tunngavissiami toqqaannartumik allassimavoq suliaq 2008-mi aallartinneqartoq, naak nalunagu suliaq naammassineqarnissaanut aningaasat naammangitsut ilisimaneqartoq. Taamatut periuseqarneq assut eqqarsarnartutut isigineqartariaqarpoq aammalu Nunatta Karsiata sanaartornermit aningaasaliussaani akisussaassuseqartumik tulleriiaarinissamut toqqaannartumik akerliulluni.

10.2 Inatsisissatut siunnersuummi kukkunerit amigaatillu aalajangersimasut

10.2.1 Ilanngussaq 2, 2010-imut oqaasertaliussanut allannguutit

Nuussineq Naalackersuisunit Aningaasaqarnermulluunniit Ataatsimiititaliamit akuersissutigineqarsimanersoq kontoni pingaarnerni ataasiakkaani nalunaarneqartarmat aallarniutigalugu oqaatigineqassaaq. Pisumi matuma kingornaniittumi siullermi Naalackersuisut ulloq akuersissutiginniffiat qulequttami nalunaarneqarsimavoq. Pisumi kingullermi Aningaasaqarnermit Ataatsimiititaliap suliamut normoritataa nalunaarneqarsimavoq.

10.2.1.1 Københavni Peqqissartut Illuat nutaaq (10-498)

Kontomut pingaarnermut 34.11.04-mut, Kalaallit nakorsartut najugaqarfiannut tunngasumut, oqaasertaliussat nutaat pingasut Aningaasaqarnermit Ataatsimiititaliamit ulloq 29. oktober 2010-mi akuersissutigineqarput. Nakorsartut Københavni najugaqarfissaannik nutaamik, anginermit ullutsinnullu naleqqunnerusumik pilersitsinissami iliusissanik pisariaqartunik iliuuserinninnissamut Naalackersuisut oqaasertaliussakkut nalinginnaasumik piginnaatinneqarput. Oqaasertaliussalli danskisui oqaasiliornikkut kukkuneqarlutillu oqaatsinik assigiissaagaanngitsunik atuiffiusimapput. Assersuutigalugu ”patientjem” aamma ”patienthotel” paarlagaallugit atorneqarput. Kukkunerit taakku aaqinneqarnissaasa sulissutiginnissaa ataatsimiititaliap aalajangiuppaa, oqaasertaliussallu iluarsiat ataatsimiititaliap suliamut allagaanut marlunnut ilanngussatut ilanngunneqarput. Taamaakkaluortoq oqaasertaliussaaqqaartut ilassutitut aningaasaliissutinut inatsimmi atorneqarnissaat Naalackersuisut toqqarsimavaat, tamannalu paasisaanngitsutut oqaatigisariaqarpoq.

10.2.2 Missingersuutitut ilanngussat

Nuussineq Naalakkersuisunit Aningaasaqarnermulluunniit Ataatsimiititaliamit akuersissutigineqarsimanersoq kontoni pingaarni ataasiakkaani nalunaarneqartarmat aallarniutigalugu oqaatigineqassaaq. Pisumi matuma kingornaniittumi siullermi Naalakkersuisut ulloq akuersissutiginniffiat qulequttami nalunaarneqarsimavoq. Pisumi kingullermi Aningaasaqarnermut Ataatsimiititaliap suliamut normorititaa nalunaarneqarsimavoq.

Konto pingarneq 20.10.41 Kommuninut taarsigassarsiat, taarsigassarsisitsineq (10-459)

Aningaasaqarnermut Ataatsimiititaliamut inassuteqaammi konto pingarneq una 20.10.42-mik taaneqarsimavoq. Taamaattumillu inatsisissatut siunnersuummi allassimasoq pinnagu konto pingaarnep normua taanna atorneqarsimasariaqaraluarpoq.

Konto pingarneq 30.10.45 Meeqqat inuusuttullu immikkut ittumik suliniuteqarfigineqarnerat (10-519)

Aningaasaliissutinik allanngineq Aningaasaqarnermut Ataatsimiititaliamit ulloq 19. november 2011-mi akuerineqarsimasoq missingersuutitut ilanngussami kukkusumik allassimavoq. Akuersineq pivoq 19. januar 2011; tassa ukioq aningaasanut inatsisip atuuffia 2010 naareersoq. Naalakkersuisulli qinnuteqaataat 22. december 2010-p missaani Aningaasaqarnermut Ataatsimiititaliamut tunniunneqarpoq, taamaattumillu qinnuteqaatip suliarineqarnissaanut mattunneqartutut ataatsimiititaliaq isigisimanngilaq. Naak ilassutitut aningaasaliissuteqarnissamik qinnuteqaatit tamarmik kingusinnerpaamik decemberip qaammataata aallartinnerani nassiutereersimanissaat Naalakkersuisoqarfinnut siusinnerusukkut Aningaasaqarnermut Ataatsimiititaliamit nalunaarutigineqareeraluarpoq taama kingusitsigisukkut ilassutitut aningaasaliissuteqarnissamik qinnuteqaatinik Naalakkersuisut nassiussisarnerat naapertuutinnngilluinnartutut oqaatigisariaqarpoq.

Illu suliami pineqartoq Namminersorlutik Oqartussanit pigineqartoq Naalakkersuisut marts 2011-mi Aningaasaqarnermut Ataatsimiititaliamut paasissutissiissutigaaq, taamaattumillu Namminersorlutik Oqartussat attartortutut pisussaaffigiunnagaat pillugit nangaassuteqarneq aalajangiinermi taaneqartoq pingaarutaaruppoq.

Konto pingarneq 64.10.25 Aluminiumimik pilersaarut (10-520)

Aningaasaqarnermut Ataatsimiititaliamut inassuteqaammi konto pingarneq una Naalakkersuisunit kukkusumik 62.10.25-imik taaneqarsimavoq. Ilassutitulli aningaasaliissutinut inatsisissatut siunnersuummi konto normu atorneqartoq eqqorpoq. Tamatuma saniatigut piffissaq ataatsimiititaliap suliamik aalajangiiffigisaa pillugu konto pingaarnep 30.10.45-p, Meeqqat inuusuttullu immikkut ittumik suliniuteqarfigineqarnerannut tunngasup, ataani tunngaviummik oqaaseqaatit aamma innersuussutigineqarput.

11. 2010-mi aningaasaliissuteqarnissamik suliassanut ataasiakkaanut oqaaseqaatit**11.1 AI-mi konto 89.71.40-mi aningaasaliissutinik atugassanngortitsinissaq aamma Ilulissani erngup nukinganik innaallagissiorfissamut akuersissut (10-457)**

Kontomut pingaarnep qulaani taaneqartumut aningaasaqarnikkut killiliussat iluanni Ilulissani erngup nukinganik nukissiorfiliornissaq pillugu Nukissiorfiit suliffeqarfimmik Pihl og Søniumik isumaqatigiissuteqarnissaat Aningaasaqarnermut Ataatsimiititaliamit ulloq 28. januar 2010-mi akuerineqarpoq.

Aalajangiinissamut tunngavissaq tamakkiisuunngitsutut isumaqarfiginartuq aalajangiinermi ataatsimiititaliap nalinginnaasumik oqaatigaa. Oqartussaasut akuersissutissaat pisariaqartut pissarsiareqqaarnagit piffissami pilersaarusiortimmi pilersaarutip nukingiutipilunneqarnissaa ilaatigut mianersoqqussutigissallugu ataatsimiititaliap pissutissaqarsimavoq. Taamatuttaaq aningaasalersueriaasissat assigiinngitsut arlallit isummernissamut tunngavissiami eqqartorneqarnerat ataatsimiititaliamit aamma tupigineqarpoq, naak taakku isummernissamut tunngavissiap inassuteqaatitaanut attuumassuteqartutut isikkoqangikkaluartut.

Tamatuma saniatigut aalajangiinermi ataatsimiititaliap ilaatigut ima allappoq:

”Aningaasartuutit siumut naatsorsuutigineqareersinnaanngitsut ilanngullugit suliassamut tamarmiusumut aningaasat atorineqartussat 652 mio. kr.-iusut Aningaasaqarnermut Ataatsimiititaliap paasivaa. Suliassamut 658 mio. kr.-it immikkoortinneqarmata 6 mio. kr.-it sinneruttut suliassami kontomut pingaarnermut naleqquttumut, assersuutigalugu kontomut pingaarnermut 80.00.01-imut, Nuussinissanut sillimmatinut tunngasumut nuunneqassapput. Tamanna pillugu Naalakkersuisut qinnuteqaammik piaartumik nassiussaqaarnissaat naatsorsuutigineqarpoq.

...

*Suliassamut aningaasaliissutit ukiumut agguataarneqarnerannik Nukissiorfiit kissaateqartut ilanngussami (Nukissorfinneersumi) aamma tassani allassimavoq. Ukiumut agguataarineq taanna aningaasanut inatsimmi ukiunik agguataarnermut naapertuussorinangilaq. Taamaattumik Aningaasaqarnermut Ataatsimiititaliap Naalakkersuisumut eqqaasitsissutigeqqissavaa Nunatta Karsiata sanaartornermut aningaasaliissutissai **piviusorsiorunik tunngaveqarluni** missingersuusiortarnissaa. Sanaartornermut aningaasat atorineqartussaannngitsut siuliani aallarniutigalugu taaneqartut naapertorlugit suliassamit piaartumik peerneqarpata apeqqu tamanna ilanngunneqassasoq Aningaasaqarnermut Ataatsimiititaliamit naatsorsuutigineqarpoq.”*

Qinnuteqaalli ataatsimiititaliamit kissaatigineqartuq tiguneqarsimasoq takuneqarsinnaanngilaq, taamaattumillu pisariaqartitsinermit sanilliullugu suliassamut 6 mio. kr.-inik amerlanernik immikkoortitsisoqarsimassasoq suli naatsorsuutigineqartariaqarpoq. Tamatuma peqatigisaanik aalajangiinermi allassimasunut ataatsimiititaliamut akissuteqarnissartik Naalakkersuisut pissutissaqartissimannngikkaat aammalu nunatta karsiata sanaartugassanut aningaasaliissutaanik atuinissap piviusorsiorunik missingersuusiortarnissaa siusinnerusukku kingusinnerusukkullu arlaleriaqaluni ataatsimiititaliap kaammattuutigisarsimagaa eqqarsaatigigaanni Naalakkersuisut pissusilersornerat **isornartoqartutut** oqaatigineqartariaqarpoq.

Erngup nukinganik nukissiorfissamut aningaasaliissutit sooq pisariaqartitsinermit naleqqussarniarneqarsimannngitsut aappasaaneerinermit **nassuiaatigeqqullugu** Naalakkersuisut qinnuigineqarput. Kiisalu suliassamut ukiunik agguataarineq Nukissiorfiit kissaatigisaannit allaanerusoq *sooq* qinnutigineqarsimanersoq paasissallugu ataatsimiititaliamit aamma kissaatigineqarpoq.

11.2 Qaasuitsup Kommunianut nunap karsianit taarsigassarsiat erniaat naafferartumillu akilersornerat (10-459)

Qaasuitsup Kommunianut december 2009-mi taarsigassarsiaritinneqartut aningaasaliissutitigut kingunerisaat ilassutitut aningaasaliissuteqarnissamik qinnuteqaatikkut matumani pineqartukku 2010-mi aningaasanut inatsimmut ilanngunneqarnissaat ulloq 12. februar 2010-mi Aningaasaqarnermut Ataatsimiititaliamit akuersissutigineqarpoq.

Aalajangiinermi ataatsimiititaliap ilaatigut ima allappoq:

”Kommunip ingerlatsinermit aningaasartuutaasa ikilisarneqarnissaat anguniarlugu Qaasuitsup Kommuniata iliuusaanik pilersaarutaanillu ingerlaavartumik ilisimatinneqartarnissaq decemberimi Aningaasaqarnermut Ataatsimiititaliap aalajangiinerani siuliani taaneqartumi Aningaasaqarnermut Ataatsimiititaliap qinnutigaa. Aningaasaqarnermut Naalakkersuisup kissaat taanna malippaa; tamannalu kingullermik pivoq 9. februar 2010-mi allakkatigut. Ilisimatitsissutip siulliup tiginissaa Aningaasaqarnermut Ataatsimiititaliap qilanaaraa.”

Tamatuma kingorna 2010-mi martsip aallartinnerani ilisimatitsissummik ataatsimiititaliap Aningaasaqarnermut Naalakkersuisumit tigusaqarpoq. Tamatuma kingorna ilisimatitsissutinik ataatsimiititaliap tigusaqaqqinngilaq, tamannalu suliaq pillugu ingerlaavartumik ilisimatinneqartarnissamik ataatsimiititaliap kissaataanut naapertuutinngilaq. Tamanna tunngavigalugu ataatsimiititaliamit tunngavissaatinneqartariaqarpoq Nunamut Namminermut Naalakkersuisoqarfik ingerlaavartumik naliliisarsimasoq kommunip tungaanit taasarialinnik aningaasaqarnikkut iliuuseqartoqarsimangitsoq, taamaattumillu kommunip aningaasaqarnera aalaakkaasumik naammaginatumillu ineriartorfiusoq, taamaattumillu ataatsimut isigalugu Aningaasaqarnermut Ataatsimiititaliamut nalunaarutissaqarsimangitsoq. Ataatsimiititaliap tamanna iluarisimaarlugu tusaatissatut tiguaa.

Naatsorsuutigisaaq akimorlugu kommunip aningaasaqarnera ilorraap tungaanut ingerlasimangippat - tamanna pillugu ataatsimiititaliap siusinnerusukkut nalunaarfiginissaa sooq Naalakkersuisunit pissutissaqartinneqarsimanginnersoq pillugu nassuiaammik ilallugu - inatsisissatut siunnersuutip uuma aappassaaneernejarnissaanut Naalakkersuisut akissuteqaataanni tamanna ersarissumik nalunaarutigineqassasoq Aningaasaqarnermut Ataatsimiititaliamit naatsorsuutigineqarpoq.

11.3 Københavni Naalakkersuisunut inissiamik tunisinissaq pisinissarlu (10-464)

Killiliussat 3,2 mio. kr.-it iluanni Naalakkersuisunut Københavni inissiamik nutaamik pisinissaq Aningaasaqarnermut Ataatsimiititaliamit ulloq 26. marts akuerineqarpoq.

Aalajangiinermi ikinnerussuteqarluni oqaaseqaateqartoqarmat ataatsimiititaliap aalajangiinerani pingaarnerit matuma kinguliani issuaavigineqarput:

”Namminersorlutik Oqartussat Københavni inissiaataata taarserneqarnissaa siunertarlugu ilanngaaseereerluni 500.000 kr.-inik aningaasaliissuteqarnissaaq Naalakkersuisut suliami matumani qinnutigaa. Taamaalillunilu Christianshavni kalaallit sinniisuutitaqarfianut sanilliullugu maanna inissiap Østerbromiinnera naapertuutinngitsutut isigineqartoq oqaatigineqarpoq.

Inissiap Naalakkersuisunut ilaasortanit aammalu Namminersorlutik Oqartussat qitiusumik allaffeqarfianni naalakkersuisoqarfinni pisortanit atorneqartarnissaa naatsorsuutigineqartoq qinnuteqaammi allassimavoq. Inatsisartunut siulittaasuusimasup inissiatogqamik siusinnerusukkut atuisarnera ataatsimiititaliamit ilisimaneqarmat maanna Inatsisartut siulittaasuata (aammalu Inatsisartunut ilaasortat sinnerisa) pisortatigoortumik angalanernut atatillugu inissiaq nutaaq aamma atortassagaat naatsorsuutigineqarpoq.

Taxanut akiligassat appasinnerulernerisigut aammalu Kalaallit Nunaata aallartitaqarfia inissiamik pisariinnerusumik sullissinerata kingunerisaanik inissiap nutaap ingerlatsinikkut sipaaruteqarfineqarnissaa naatsorsuutigineqartoq qinnuteqaammi allassimavoq. Sipaarutaasinnaasunut taakkununga ersarissumik ataatsimut missingersuummik Naalakkersuisut saqqummiussimasinnaagaluartut ataatsimiititaliap isumaqarpoq.

Ataatsimiititaliamit isumaqatigiittumit oqaatigineqassaaq Københavni inissiamik nutaamik pisinissaq 2010-mi imaluunniit 2011-mi aningaasanut inatsisissatut siunnersuummut ilanngunneqarsimasariaqaraluartoq. Taamaalillunilu ataatsimiititaliap isumaqarpoq suliaq matumani

pineqartutut ittoq Nunatta Karsiata aningaasaataanik Inatsisartut pingaarnersiuineranni ilanngunneqarluarsinnaasimagaluartoq.

Tamatuma kingorna ataatsimiititaliaq suliami matumani amerlanerussuteqartunut ikinnerussuteqartunullu avippoq.

Ataatsimiititaliami ikinnerussuteqartut, Per Berthelsen aamma Finn Karlsen isumaqarput piffissami pisortat sipaaruteqarfigisaanni nunattalu karsiata killilinnik aningaasaateqarnerani Namminersorlutik Oqartussat Københavni inissiaataannik taarsiinissamut pisortat aningaasaataannik atuinissaq pissusissamisuunngitsoq. Inissiamik nutamik pisinerup annertunerusumik sipaaruteqarfigineqarnissaa ikinnerussuteqartut uppernarsisinneqanngitsutut isigaat, taamaattumillu qinnuteqaat ataatsimut isigalugu itigartinneqartussatut inassutigalugu.

Ataatsimiititaliami amerlanerussuteqartut, Naaja Nathanielsen, Olga P. Berthelsen aamma Niels Thomsen isumaqarput inissiap nutaap Københavni qiterpasinnerusumi inissisimanerata pitsaaqutaasigut inissiap pigineqareersup taarserneqarneratigut ataasiartumik killilinnik aningaasartuutit matususerneqartut. Tamanna tunngavigalugu amerlanerussuteqartut qinnuteqaat akuerisinnaavaat.

Amerlanerussuteqartut kissaataat naapertorlugu aalajangiisoqarpoq.”

11.4 KIIN-ip suliassa qarfiata iluani missingersuutitut iluarsii sutit piviusunngortinneqarnissaat (10-475 aamma 10-479)

Aningaasaqarnermut Ataatsimiititaliap siunnersuuteqarneratigut Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfimmi 2010-mi 2 mio. kr.-it ukiunilu missingersuusiorfinni tullerni ataasiakkaani tamani 4 mio. kr.-it sipaarutiginissaat 2010-mi aningaasanut inatsimmi missingersuutitut iluarsii sutigineqarput. Naalakkersuisoqarfiit sinnerisa ukiuni taakkunani sipaarutaasa ilaannik naapertuuttunik Naalakkersuisoqarfiup taassuma aamma nammataqarnissaata qulakkeernissaata pisariaqartinneqarnera eqqarsaatigalugu sipaarutissat taakku naapertuuttutut Aningaasaqarnermut Ataatsimiititaliamit isigineqarput. Sipaaruteqarnissamik siunnersuutip saqqummiunneqannginnerani ataatsimiititaliaq Naalakkersuisoqarfimmut arlalinnik apeqquteqarpoq; akissummilli qularnaatsumik tigusaqarani.

Sipaarutissat qitiusumik allaffeqarfimmi sapinngisamik ingerlanniarneqarnissaat aammalu Inuussutissarsiutinut Ilinniartitaanerit Ilinniarnertuunngorni arfiillu eqqornaveersaarneqassasut allannguutissatut siunnersuutimini ataatsimiititaliap piumasaaqatigaa.

Tamatuma kingorna 2 mio. kr.-inik sipaaruteqarnissap missingersuutitut iluarsii sutesuutarnikkut piviusunngortinneqarnissaa siunertaralugu Naalakkersuisoqarfik aningaasaliissutesuutarnissamik qinnuteqaammik 2010-mi aprilip naanerani nassiussivoq (10-475). Aningaasaqarnermullu Ataatsimiititaliap ajuusaarutigisaminik paasivaa Naalakkersuisoqarfiup qitiusumik allaffeqarfini (konto pingaarnearfiit pingasut 40.01.01, 40.02.01 aamma 40.90.01) 15.000 kr. aamma 27.000 kr.-iinnaat akornanni taamaallaat sipaaruteqarnissamik peqqussimagaa. Sipaarutissat sinneri ilinniarfinnut kulturikkullu ingerlatsivinnut peqqussutigineqarsimapput. Tamanna aningaasanut inatsimmi aningaasaliinermut tunngavigineqartunut naapertuutinnngilluinnartutut ataatsimiititaliamit isigineqarpoq, tamatumalu kingorna qinnuteqaat **itigartinneqarpoq**. Tamatuma peqatigisaanik qinnuteqaatip nutaap aningaasanut inatsimmi aningaasaliinermut tunngavigineqartunut naapertuunnerusup tiguneqarnissaa ataatsimiititaliamit qinnutigineqarpoq.

Qinnuteqaat nutaaq taanna ataatsimiititaliamit 2010-mi junip qiteqqunnerani tiguneqarpoq (10-479). Ataatsimiititaliamilli paasineqarpoq tusarniaaneq pillugu qinnuteqaammi immikkoortoq

kukkusullunilu eqqortumik takutitsinngitosq, tassa kukkusumik allassimammat isummernissamut tunngavissiaq Aningaasaqarnermut Naalakkersuisoqarfimmut tusarniaassutigineqarsimasoq, tamannali eqqunngilaq. Tassunga atatillugu oqaatigineqassaaq tusarniaanermut tunngasumik maleruagassanik Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfik arlaleriarluni eqquutsitsisarsimanngimmat.⁴ Suliami matumani pineqartumi missingersuusiornermut malittarisassani aalajangersakkat unioqqutinneqarsimanerat ataatsimiititaliap aammaarluni uparuaaffigaa, tamatumalu kingorna qinnuteqaat nutaaq akuersissutigineqarluni.

11.5 Arctic Umiaq Linemut aningaasaliissuteqaqqinnissaq pillugu qinnuteqaat (10-476)

2010-mi maj-augustimi Qaqortup Ilulissallu akornanni Arctic Umiaq Linep angallassinera ingerlatiinnarnissaanut 4,287 mio. kr.-inik ilassutitut aningaasaliissuteqarnissaq Aningaasaqarnermut Ataatsimiititaliamit ulloq 6. maj 2010-mi akuersissutigineqarpoq. Aalajangiinnermini ataatsimiititaliaq immikkut ima oqaaseqarpoq ”...”...*Naalakkersuisut inassuteqaataat aningaasaqarnikkut pisariillisaanermik tunngaveqanngilaq, kisiannili naalakkersuinikkut kissateqarnermik tunngaveqarluni*”. Taamaallutik Angallannermut Isumalioqatigiissitap sulinerminik naammassinninnissaata tungaanut ingerlatseqatigiiffiup amigartooruteqarfusumik ingerlatsinera ingerlatiinnarneqassasoq, tamatumalu kingorna ingerlatseqatigiiffiup qanoq pineqarnissaa isummerfigineqassasoq Naalakkersuisut kissaatigaat.”

Tamanna ataatsimiititaliap amerlanerusunik apeqquteqarnissaanut tunngavissiiuvoq. Tamatuma kingorna 2010-mi august ilanngullugu ingerlatseqatigiiffimmut tapiissuteqarnissaq taperserniarlugu ataatsimiititaliaq aalajangerpoq, tamatumalu peqatigisaanik Angallannermut Isumalioqatigiissitap kaammattuutaasa utaqqineqarnissaat ataatsimiititaliamit aalajangiunneqarpoq, tassa angallassinermut tassunga tapiissuteqartarnerup ingerlatiinnarnissaanut taamaatinneqarnissaanulluunniit naalakkersuinikkut aalajangiinissamut taakku tunngavissatut naleqquttutut isigineqarmata.

11.6 PCB eqqarsaatigalugu qulaajaalluni suliniuteqarnissamut iliuusissatullu pilersaarusiornissamut aningaasaliissutinik qinnuteqaat (10-493)

Sanaartukkani PCB-p qanoq annertutigisumik atugaasimaneranik naliliinissami atorneqartussamik iliuusissatut pilersaarummik ineriartortitsinissap aallartinneqarnissaanut sillimmatitut aningaasaliussat atugassiissutigineqarnissaannik qinnuteqaat Aningaasaqarnermut Ataatsimiititaliamit ulloq 30. september 2010-mi akuersissutigineqarpoq. Tamanna ataatsimiititaliamit politikikkut imaaliillaannaq akuerineqarsinnaavoq. Qinnuteqaammulli ilanngunneqarsimavoq oqaasertaliussaq aningaasanik atorneqanngitsunik 2011-mi atugassanngorlugit nuussinissamik piginnaatitsisoq. Oqaasertaliussaq “Namminersorlutik Oqartussanut” piginnaatitsissutitut kukkusumik ilusilerneqarsimasoq ataatsimiititaliamit tikkuarneqarpoq qinnutigineqarlunilu taanna ”Naalakkersuisut”-nut iluarsineqassasoq.

Ataatsimiititaliap kissaataanut ilaatigut tunngaviuvoq namminersorneq pillugu inatsit, tassanimi nassuiarneqarmat Namminersorlutik Oqartussat tassaasoq Inatsisartut Naalakkersuisullu pillugit ataatsimoortumik taaguut, taamaattumillu ersarilluinnartumik kukkuneruvoq oqaasertaliussami Namminersorlutik Oqartussanut piginnaatitsissuteqarneq. Ilaatigullu Naalakkersuisut

⁴ Assersuutigalugu takuuk Qasigiannuani efterskolimik pilersitsineq pillugu 2008-mi aningaasaliissuteqarnissamik suliaq nassuiaateeqqami 1-mi taaneqartoq.

missingersuusiormut namminneq malittarisassiaanni immikkoortoq 3.2-mi allassimavoq oqaasertaliussakkut piginnaatitsissutit Naalakkersuisunut pinerit tamaasa tunniunneqartassasut.

Kontomulli pingaarnermut 77.05.01-imut, Mingutsaaliuinermit atortulersuutit ingerlatsinermit tunngasumut, oqaasertaliussassatut siunnersuutigineqartoq suli kukkusumik taama oqaasertaqarpoq, taamaalillunilu aqqinneqarsimanani. Tamanna allaffissornikkut **sumiginnaanertut** soorunami akuersaarneqarsinnaanngitsutut isigineqartariaqarpoq.

11.7 Puisit amiinut ilassutitut aningaasaliissuteqarnissamik qinnuteqaat (10-503 aamma 10-515)

Kontomut pingaarnermut 51.02.03-mut, Puisit amiinik tunisinermit akinut tapiissutit tunngasumut, 1,5 mio. kr.-inik ilassutitut aningaasaliissuteqarnissaq Aningaasaqarnermit Ataatsimiititaliamit ulloq 11. november 2010-mi akuersissutigineqarpoq. Amminik ukiumut 87.000-inik pisinissamik 2010-mi aningaasanut inatsimmi killiliussamut sanilliullugu amminik allanik 3.700-inik tunisinissamut aningaasatigut tunngavissat ilassutitut aningaasaliissutikkut qulakkerneqarput, taamaalillunilu puisit amiinik tigooraaneq taamani matusimasoq ammaqqinneqarpoq (Suliaq 10-503).

Ullorli 10. december 2010-mi Naalakkersuisut aalajangerput siunertamut tassunga 1,5 mio. kr.-inik qinnuteqartoqaaqqissasoq. Puisit amiinik tunisinerup ammaqqinneqarnerata kingorna puisip amiinik amerlasoorujussuarnik tunisisoqarnera qinnuteqarnermit tunuliaqutaavoq, tamannalu piffissami puisit amiinik tunisinngiffimmi amminik kingusinnerusukkat tunisassanik toqqortuisoqarsimaneranik pissuteqartoq oqaatigineqarpoq.

Qinnuteqaammik nutaamik saqqummiussineq Aningaasaqarnermit Ataatsimiititaliamit assut naammagineqanngilaq, soorluttaaq aamma paasineqartoq missingersuusiormut malittarisassami 2008-meersumi tusarniaanermut maleruaqqusat qinnuteqaammi tassani aamma malinneqarsimannngitsut. Tamatuma saniatigut puisit amiinik tunisinermit tunngasumik tunngaviumik isummiussanik arlalinnik ataatsimiititaliaq saqqummiussimmat aammalu aalajangiinermi ikinnerussuteqartiarluni oqaaseqaateqartoqarmat ataatsimiititaliaq aalajangiinera matuma kinguliani tamakkiisumik issuarneqarpoq:

"Naalakkersuisut suliassami matumani puisit amiinik tunisinermit tapiissutit aningaasaliissutit 1,5 mio. kr.-inik qaffanneqarnissaat qinnutigaat. Qinnuteqartoqarpoq aningaasaliissutit taakku amerlaqataannik qaffanneqarnissaannik Aningaasaqarnermit Ataatsimiititaliaq akuersissuteqarneraniit (Suliaq 10-503) qaammat ataaseq qaangiutiinnartoq.

Ataatsimiititaliaq isumaqarpoq, naammaginannngilluinnartoq puisit amiinut tunisinermit tapiissutit aningaasaliissutit amerlineqaqqinnissaannik qinnuteqaqqittoqarnera. Ataatsimiititaliaq arlaleriaqaluni uparuartarpaa pisariaqarmat piniarnermik inuussutissarsuteqarneq eqqarsaatigalugu ataatsimut aqqiissuteqartoqartariaqarnera, pisortanit tapiissuteqaannartarnermit atitunerusumik. Tamatuma erseqqissaatigineqarsinnaapput ilinniartitseqqiisarnerit, sulianik allanik tigusaqarsinnaanermut ilinniartitaanerit inuussutissarsiummillu ingerlataqartut ikilisinneqarsinnaaneri inuussutissarsiutip patajaallisarneqarnissaa siunertaralugu.

Immikkut amigaatigineqartutut maluginiarneqarpoq isummernissamut tunngavissiaq imaluunniit suliassaqqarfimmi naalakkersuinikkut anguniakkat sunnguamilluunniit Isumaginninnermit Naalakkersuisoqqarfimmut imaluunniit Kultureqarnermit, Ilinniartitaanermut, Ilisimatusarnermit Ilageeqarnermullu Naalakkersuisoqqarfimmut ataqatigiissaarneqarsimannngitsutut isikkoqarmata.

Ataatsimiititaliap maluginiarpaa aningaasaliissutit qaffanneqarnissaannut tunngavilersuutitut benziinap akitsoriartornera innersuunneqarmat. Ataatsimiititaliaq isumaqarpoq pissusissamisunnngilluinnartooq taamatut erseqqilluinnartumik kukkusumik tunngavilersuisoqarmat Naalakkersuisut Aningaasaqarnermullu Ataatsimiititaliap isummernissaannut tunngavissiami. Ilisimaneqartutut benziinamut akitsuut 1. januar 2011-miit aatsaat atuutilersussaavoq.

Tamatuma saniatigut ataatsimiititaliap suliassami 10-503-mi aalajangiinini innersuussutigissavaa, tamatumani ataatsimiititaliaq ima allammat:

”Nunatta Ammeriviata siunissamut periarfissaanik misissueqqissaarnissaq siunertaralugu suleqatigiissitap siusinnerusukkut pilersinneqartup suliainik kaammattuutiminillu piaartumik saqqummiussinissaata ersarissumik pisariaqartinneqarneratut suliaq una ataatsimiititaliamit isigineqarpoq. Tassunga atatillugu isumaginninnikkut suliffeqarnikkullu isiginiagassat naapertuunnerusumik immikkoortinneqarnissaannut suleqatigiissitap kaammattuutai peqataaqataajumaartut neriuutigigini ataatsimiititaliap oqaatigissavaa.”

Siuliami issuarneqartoq suli tamakkiisumik atuuttut isigineqarpoq. Ataatsimiititaliap tamatumunnga ilassutitut Naalakkersuisunut kaammattuutigerussupaa tapiissuteqariaatsinik nalilersuilluni misissueqqissaarneq Naalakkersuisut siulittaasuannit eqqartorneqarsimasoq piaartumik naammassiniaqqullugu, taannami pisariaqartutut atorluarneqarsinnaasutullu isigineqarmat.

Ataatsimiititaliap maluginiarpaa Missingersuusiortarnermut malittarisassani 2008-meersuni, imm. 4.3, akerlianik taaneqarsimangimmat Aningaasaqarnermut Naalakkersuisoqarfiup tusarniaanermi akissuteqaataa isummernissamut tunngavissiami isiginiarneqarsimanersoq. Taamaattumik ataatsimiititaliap qinnuteqaat aatsaat akuerisinnaavaa isummernissamut tunngavissiaq tusarniaatigineqarsimappat.

Aningaasaqarnermut Ataatsimiititaliami ikinnerussuteqartup, Niels Thomsenip, qinnuteqaat akuerisinnaangilaa manna tunngavilersuutigalugu:

”Ikinnerussuteqartut maluginiarpaat ukiumut puisit amiinut tapiissutinut aningaasaliissutit naatsorsuutigisamit sukkanerusumik atorneqarsimasut. Immikkut maluginiarneqarpoq decembarip aallartilaaernerani annertuumik tunisisoqarsimasoq. Ukiumut aningaasaliissutit ukioq ataasiunngitsorluunniit nungunneqarpata tamanna isumaqarpoq piniartut ameerniartartut ukioq tamaat isertitassatut naatsorsuutigisinnasaminnik ukioq ataasiunngitsorluunniit isertitaqarsimanissaat, taamaattumillu ukiup sinneranut aningaasanik immikkoortitsisimasariaqaluarlutik. Taamaattumik pisortat suliassarisariaqanngikkaluarpaat tunisisinnaneq ingerlatiinnarniarlugu ikiorsiissutitut aningaasaliissuteqaqqinnissaq. Isuma tamanna aamma aalisarnermut ilanngullugu tunngatinneqarsinnaavoq, tassami aalisartut aningaasaqarniarnerat qularnaarniarlugu maani ukiup naalernerani pisassiissutit suli amerlineqaqqinnissaannik qinnuteqartoqartarmat.

Ikinnerussuteqartut isumaqarput immikkut uggornarmat aningaasaliissutit nuttarsinnaanerup siuarsarneqarnissaanut aningaasaliissutinut tiguniarneqarmata, taamaaliornikkummi pissusiviusut isigissagaanni aningaasaliissutit taakku siunertaaqqaartumut akerliulluinnartumik atorneqassammata, nuttarsinnaanermummi aningaasaliissutit siunertarperpiarmassuk sulisinnaasunut inuussutissarsiutinut aningaasatigut imminnut napatissinnaanerusunut ikaarsaariartuaarnissaat.

Ikinnerussuteqartut isumaqarputtaaq decembarip qaammataani aalisartut piniartullu iluaqutissaannik suliniutissanik assigiinnngitsunik qinnuteqaatit assigiinnngitsut siusinnerusukkut Naalakkersuisuusimasut arlaleriaqalutik piniarnermik inuussutissarsiutilinnut juullilernerani tapiissuteqartarsimanerannik taamanikkullu illuatungiliuttuusunit sakkortuumik isornartorsiorneqartarsimasunik pissusissamisunnngitsumik eqqaasitsimmata. Assersuutigalugumi soq illoqarfinni anginerusunik anaanat kisermaat allalluunniit inuuniarnerminni ajornartorsiuteqartut taamaqataanik ajunngitsumik pineqassanngillat? ”.

Aningaasaqarnermut Ataatsimiititaliami amerlanerussuteqartut, Ataatsimiititaliami ilaasortat sinnerisa, qinnuteqaat akueraat isummernissamut tunngavissiami tunngavilersuutit innersuussutigalugit.

Aningaasaqarnermut Ataatsimiititaliap aalajangernera

Aningaasaqarnermut Ataatsimiititaliami amerlanerussuteqartut Naalackersuisunit inassuteqaatit akueraat piumasagaatitalalugu Aningaasaqarnermut Naalackersuisup ullumimii ullut arfineq-marluk qaangiutsinnagit allakkatigut uppersassagaa isummernissamut tunngavissiaq Aningaasaqarnermut Ataatsimiititaliamut nassiunneqannginnermini Missingersuusiortarnermut malittarisassani 2008-meersuni imm. 4.3 naapertorlugu Aningaasaqarnermut Naalackersuisoqarfimmut tusarniaatigineqarsimasoq tusarniaanermilu akissutigineqartoq isummernissamut tunngavissiamut ilanngunneqarsimasoq. Taamatut uppersaammik nassiussisoqanngippat (nassiussisoqarsinnaanngippat) Ataatsimiititaliap aalajangernera ingerlaannaq atorunnaassaaq.

Isummernissamut tunngavissiap tusarniaassutigineqarsimaneranut uppersaammik Aningaasaqarnermut Naalackersuisoqarfimmit ataatsimiititaliaq tamatuma kingorna tigusaqarpoq. Taamaalillunilu isummernissamut tunngavissiaq ulloq 10. december, nal. 11.28 tusarniaassutigineqarsimavoq qinnutigineqarlunilu ulloq taanna kingusinnerpaamik nal. 12.30 akissuteqartoqassasoq. Taamaalillunilu tusarniaanermut akissuteqarnissamut akunneq ataaseqqissaangajak piffissaliisoqarsimavoq! Tusarniaanermut taama sivikitsigisumik piffissaliineq **pimoorussinnginnertut** taasariaavoq. Tamatumunngalu naapertuuttumik tusarniaanermut taama sivikitsigisumik piffissaliineq ”immikkut isumakulunnartut” tusarniaanermut akissummi Aningaasaqarnermut Naalackersuisoqarfimmit oqaatigineqarpoq. Tamatumali peqatigisaanik Naalackersuisoqarfimmit oqaatigineqarpoq tusarniaanermut akissuteqarnissamut taama sivikitsigisumik piffissaliinermut Aalisarnermut Piniarnermullu Naalackersuisoqarfimmi suliasamik kigaalaarussisimaneq pissutaanngitsaq; akerlianilli tassaalluni Naalackersuisut politikikkut kissaataat. Tassunga atatillugu Aningaasaqarnermut Ataatsimiititaliap oqaatigaa decemberip qaammataani kingusissukkut ilassutitut aningaasaliissuteqarnissamik qinnuteqaatinik nassiussisoqartariaqanngitsaq ataatsimiititaliap 2010-mi novemberip qaammataanili Naalackersuisunut eqqaasitsutigigaa, Naalackersuisullu tamatumunnga naapertuunnerusumik sulianik piareersaanertik ingerlassimasariaqaraluarpaat. Tamatuma pisimannginnera assut ajuusaarnartutut isigisariaqarpoq.

Aningaasaliissutinik atuinnissaq pillugu nassuiaammik ataatsimiititaliaq ulloq 7. januar tigusaqarpoq. Nassuiaat taanna isumaliutissiissummi ilanngussaq A-mi suliamut 10-515-imut ilanngussap ataanut ilanngunneqarpoq.

Naggasiullugu paasissutissiissutigineqassaaq Great Greenlandip siunissaa pillugu nassuiaat aalajangiinnermi taaneqartoq Aningaasaqarnermut Ataatsimiititaliamit aatsaat ulloq 9. marts 2011-mi tiguneqarmat.

11.8 2010-miit 2013-imut ilinniartunut inissianut pilersarusiornissamut sanaartornissamullu atugassiinissaq (10-507)

Ilinniartut inaannik sanaartornissap aallartinneqarnissaa siunertaralugu sanaartornermut atugassat agguanneqanngitsut 2010-mi 13 mio. kr.-it ukiunilu missingersuusiortarnermi aningaasat amerlanerit atugassanngortinneqarnissaat Aningaasaqarnermut Ataatsimiititaliamit ulloq 3. december 2010-mi akuersissutigineqarpoq.

Qinnuteqaammi pissutsit arlallit oqaaseqarfiginissaat ataatsimiititaliamit pissutissaqartinneqarpoq:

Naalackersuisut allattoqarfianni sanaartorneq pillugu annertuumik isumaqatigiinngitsogarnera pissutigalugu 2010-mi aningaasanut inatsimmi sanaartornermut atugassat agguanneqanngitsut

ilinniartut inaannut atorneqarnissaasa pilersarusiornera assut kinguartoorfusimasoq siullermik oqaatigineqarpoq. Tamanna naapertuutinnngilluinnartut isigineqarpoq.

Aappaattut oqaatigineqarpoq ilinniartut inaannut tunngasuni immikkoortumut pilersaarummik, atuarfiit pillugit immikkoortumut pilersaarutip assinganik suliaqartoqassasoq. Tamanna ataatsimiititaliamit assut tapersersornartinneqarpoq. Immikkoortumut pilersaarutip taassuma suliarineqarnera pingaartinneqarluni salliutinneqassasoq ataatsimiititaliamit erseqqissumik **kaammattuutigineqarpoq**, taamaaliornikkut pilersaarutissatut missingiusiaq Inatsisartut 2011-mi upernaakkut ataatsimiinneranni saqqummiunneqarsinnaaqullugu. Immikkoortumut pilersaarut UPA 11-mi qanoq ilisukkut agguanneqassanersoq aappassaaneerinnermut akissuteqaamminni paasissutissiissutigeqqullugu Naalackersuisut qinnuigineqarput. Immikkoortumut pilersaarummut missingiusiaq ilimagisaq uniorlugu piareersimanngippat suliaq qangarpiaq aallartinneqarsimanersoq aammalu missingiusiaq qagugu piariissanersoq paasissutissiissutigeqquneqarpoq. Tassunga atatillugu eqqaasitsissutigineqassaaq ataatsimiititaliaq aalajangiinnermini naggasiutitut ima allamat:

”Taamaalillunilu kinguaattooqqittoqassappat ataatsimiititaliamit akuersaaruminaatsinneqassaaq!”

Pingajuattut oqaatigineqarpoq ilinniartut inaannik sanaartornermut tunngasunut aningaasat immikkoortinneqartut pillugit kontomi pingaarnermi 80.00.00-imi, Sanaartornermut atugassanut agguanneqanngitsunut tunngasumi, missingersuutitut ilanngussami nassiuunneqartumi ima allassimasoqartoq: *”Aningaasat illoqarfinnut ataasiakkaanut suliasanut nassuiaasiorfigineqanngitsunut aningaasartassaallu nalaatsornerinnakkut annertussusilerneqartunut immikkoortitaapput.”* Tamanna ataatsimiititaliamit ima paasineqarpoq ilinniartut inaannik sanaartornissamat aningaasanut inatsimmi aningaasaliunneqartut taamungaannaq aammalu pilersarusiornera taqanngitsumik immikkoortinneqarsimasut! Tamatuma imaannaannginnera aningaasat atugassiissutigineqarnissaasa taama kingusitsigisukkut qinnutigineqarneratigut naqissuserneqarpoq – atugassiinerlu taanna tassaaginnarpoq aningaasat immikkoortinneqarsimasut ukiup naanerani Nunatta Karsianut utertiinnarnissaat pinngitsoortinniarlugu aningaasanik kontomit pingaarnermi 80.00.00-imit kontomut pingaarnermut 84.40.15-imut, Ilinniartut inaannik sanaartornermut tunngasumut, nuussineq. Taarsiullugu aningaasat maanna Sanaartornermut Iluarsaanermullu Aningaasaateqarfimmi uninngasuutigineqaannarput. Tamanna Aningaasaqarnermut Ataatsimiititaliamit **“isornartoqartinneqarpoq”**.

Kontomut pingaarnermut 80.00.00-mut, Sanaartornermut atugassanut agguanneqanngitsunut tunngasumut, missingersuutitut ilanngussaq kukkuneqarmat missingersuutitut ilanngussamik eqqortumik takutitsisumik kingusinnerpaamik 31. december 2010-mi Aningaasaqarnermut Ataatsimiititaliamut nassiuussisoqarnissaa **tunngavissaatillugu** Naalackersuisut inassuteqaataat ataatsimiititaliamit **akuersissutigineqarput**. Tamanna pinngilaq, taamaalillunilu aningaasaliissuteqarnissamik suliamik tassanga Aningaasaqarnermut Ataatsimiititaliap akuersissutiginninnera atorunnaarpoq. Naallu missingersuutitut ilanngussami kukkuneq ersarinnerpaaq inatsisissatut siunnersuummi saqqummiunneqartumi Naalackersuisut iluarsisimagaluaaraat missingersuutitut ilanngussamik eqqortumik takutitsisunik nassiuussinnginneq kiisalu suliniutip politikikkut assut pingaartinneqartup annertuumik kinguartoorfiunera ataatsimut **naammaginannngilluinnartut** oqaatigineqartariaqarput!

11.9 B2171, Imaneq 27-mi oqoqarnerata kingunerisaanik ilassutitut aningaasaliissutissanik qinnuteqarneq (10-509)

Nuummi B-2171-ip oqoqarnera pillugu iluarsaannissaanut 1,3 mio. kr.-inik ilassutitut aningaasaliissuteqarnissaq Aningaasaqarnermut Ataatsimiititaliamit ulloq 20. december 2010-mi akuersissutigineqarpoq. B-2171 attartortitsisartumit namminersortumit attartugaavoq, taamaattumillu ataatsimiititaliaq isumaqarluni iluarsaannermut taassumunnga aningaasaqarnikkut akisussaasuusoq tassararisariaqartoq attartortitsisoq. Paasinarsivorli Namminersorlutik Oqartussat nammineerlutik aammalu attartortitsisumut ilisimatitsissuteqaqqaaratik illumik iluarsaasimasut, taamaalillunilu iluarsaaneq attartortitsisumut akisussaaffigineeruppoq attartortumut ajoqutaasumik; tassa Namminersorlutik Oqartussanut. Taamaattumillu Namminersorlutik Oqartussat attartorneri pillugit najoqqutassianik, Namminersorlutik Oqartussat naapertuutinngitsumik imaluunniit akisussaatinneqarnermik kinguneqarsinnaasumik iliuseqarnermikkut attartortitsisumut namminersortumut sanilliullugu pisinnaatitaaffimminnik killiliinnginnissaannut qulakkeerinnissaasunik suliaqartoqartariaqartoq ataatsimiititaliaq isumaqarpoq.

11.10 Naatsorsueqqissaartarfimmum ilassutitut aningaasaliissutit (10-513)

Aningaasaqarnermut Naalakkersuisoqarfimmum Naatsorsueqqissaartarfimmum 850.000 kr.-inik nuussinissaq Aningaasaqarnermut Ataatsimiititaliamit ulloq 13. december 2010-mi akuersissutigineqarpoq.

Suliap aalajangiiffiginerani ataatsimiititaliap Naalakkersuisut sakkortuumik isornartorsiorpai, tassa ilaatigut paasineqarmat aningaasaliissuteqarnissamik pisariaqartitsineq siumut naatsorsuutigineqarsinnaasimasoq ilaatigullu missingersuusiornermut inatsit unioqqutillugu aningaasat atorneqareerneranni aningaasaliinertut aningaasaliinissaq isikkoqarmat.

Ataatsimiititaliap isornartorsiuinini ima oqaasertalerpaa:

”Aningaasaliissuteqarnissamut pisariaqartitsinerumt tunuliaqutaasoq ima allaaserineqarpoq:

”Kingullermik missingersuutiniq malitseqartitsinerup takutippaa Naatsorsueqqissaartarfiup aningaasarsianut missingersuutini 20 %-inik sipportussanngorai. Sippuisoqalerneranut pissutaapput pitsaanngitsumik missingersuusiorsimaneq malitseqartitsisarnerlu. Atuinerunermut pissutaarpiarput naatsorsueqqissaartarfiup pisortarisimasaata soraarneranut aningaasartuutit, erninerup nalaani sulinnngiffeqarnermut aningaasartuutit kiisalu feeriarnerisuiutinut siunnersortinullu aningaasartuutit.

Aningaasarsianut missingersuutiniq sippuineq katillugit 1,6 mio. koruuninik annertussuseqassanganneqarpoq. Taakkununnga ilanngunneqassapput aningaasartuutini allani 60.000 koruuninik annikinnerusunik sippuinerit. Kisiannili Naatsorsueqqissaartarfik suliaqartitsisut missingersuutiniq naleqqiullugu annertunerusunik isertitaqarsimavoq, taamaalilluni amerlanerusunik aningaasaliissutigineqartussatut pisariaqartitat 920.000 koruunit 740.000 koruuninut ikilillutik.

Taakku saniatigut 110.000 koruuninik qinnuteqartoqarpoq nuna tamakkerlugu naatsorsuutit suliarineqarnissaannut. Naatsorsueqqissaartarfik nuna tamakkerlugu naatsorsuutit pilersikkiartorneqarnerat naammassiniarlugu aningaasaliissutissanik amigaateqarpoq, tamatumunngattaq ajortumik missingersuusiorsimaneq pissutaalluni.”

Ataatsimiititaliap tamatuma saniatigut immikkut uku Missingersuutit pillugit inatsimmut tunngasut maluginiarpai:

”Missingersuusiornarlunneq ilassutitut aningaasaliissutissanik qinnuteqaateqarnermut pingaarnertut pissutaamat, missingersuusiortarneq pillugu inatsimmi § 28 malillugu naatsorsuutigeriinnngisanik aningaasartuutit pineqanngillat, taamaamat inatsimmut oqaasertaliussat naapertorlugit

pingaarnertut ilassutitut aningaasaliisoqarnissaanik qinnuteqartoqartariaqarani. Taamaakkaluartuq qinnuteqartoqarneranut pissutaavoq Aningaasaqarnermut Naalakkersuisoqarfiup aatsaat maannakkut paasisimammagu missingersuutitigut ajornartorsiuteqartoqartoq. Taamatuttaaq naatsorsuutigisatut atuinerunissanut matusissutissanik nassaarniartoqartariaqarpoq, tassami Naatsorsueqqissaartarfiup ukiup sinneranut aningaasarsianut akiliutigisartakkani unitsiinnarsinnaanngimmagit, taamaammat qinnuteqaat naatsorsuutigisatut aningaasat atorneqareerneranni aningaasaliissutitut isikkoqarpoq.”

*Ataatsimiititaliap taamaalillugu paasivaa siumut akuersissutitaqanngitsumik aningaasartuuteqartoqartarsimasoq, tamanna Missingersuutit pillugit inatsimmi § 1, imm. 3-mik unioqquitsineruvoq, tassani takuneqarsinnaammat aningaasartuuteqartoqarsinnaanngitsuoq siunertamut siumut aningaasaliissuteqartoqarsimangippat. Pissutsit taamaannera **kanngunaannartutut** oqaatigineqartariaqarpoq.”*

Nunatta Karsiata 2010-mut naatsorsuutai pillugit ataatsimiititaliap isumaliutissiissusiorneranut atatillugu taassuminnga malitseqartitsisinnaanera siunertalugu suliani taamaattuni pisarnek malillugu tamatuma kingorna suliaq pillugu Kukkunersiunerumut Ataatsimiititaliaq ilisimatinneqarpoq.

11.11 Qaasuitsup Kommuniiani aqutsiveqarfinni Upernavimmi aamma Ummannami qassutinik annaasimasanik qalluinikkut saliisitsineq (10-516)

Upernavimmi Ummannamilu qassutinik qalluinikkut saliinissamut 0,5 mio. kr.-inik ilassutitut aningaasaliissuteqarnissaq Aningaasaqarnermut Ataatsimiititaliamit ulloq 13. december 2010-mi akuersissutigineqarpoq.

Aalisarnermut politikimik ilusiliinissamut kissaatinik tunngaviusunik siumullu isigisunik arlalinnik ataatsimiititaliaq saqqummiussimmat ataatsimiititaliap aalajangiinera tamakkiisoq matuma kinguliani issuarneqarpoq:

”Aningaasaliissutit qinnutigineqartut pisassanik qaffaanermut taarsiutitut isigineqassapput, aqutsiveqarfinnummi pineqartunut qalerallitassiissutit nungunneqareermata.

Aningaasaqarnermut Ataatsimiititaliaq tunngaviusumik isumaqarpoq pitsaasuulluni naapertuuttusoq taamatut qassutaarsiutit qallorneqartarpat. Qassutit qimaannakkat aalisagassutsimik ulorianartorsiortitsisinnaapput, taamaattumillu pissussamisoorluni tamatumani siunnerfilimmik iliuseqartoqartarpat.

Ataatsimiititaliap ilisimaaraa aalisartorpassuit qassutaarsiutitik piniutaarsiutitillu nalunaarutigineq ajoraat. Naalakkersuisut qularnaarniartariaqarpaat qassutaarsiutit piniutaarsiutitillu aalajangersimasumik periaaseqarluni nalunaarutigineqartalernissaat.

Ataatsimiititaliaq isumaqarpoq aalisartut namminneq pisussaaffigisariaqaraluaat - aningaasaqarniarnerlu eqqarsaatigalugu nammineq soqutigisariaqarlugu – namminneq qassutaarsiutitik qallussallugit Nunatta Karsianit akilerneqanngitsumik, qassutaarsiutimmi ilisimanegartutut aalisagassutsimut ajoqutaammata. Taamatut qassutaarsiutinik qalluinissamut pisortanit tapiissuteqaqqinnikkut Naalakkersuisut siunissaq eqqarsaatigalugu aalisartut akornanni neriulluarnermik pilersitsisinnaapput siunissami aamma qassutaarsiutinik qalluinissamut pisortat tapiissuteqaqqikkumaartut, taamaaliornikkullu inuussutissarsiortut namminneq piumassutsiminnik qalluerujussuseqarnerat annikillisinneqarluniluunniit peerutivissinnaalluni. Taamaaliortuarnikkut taamaalilluni iliuseqarusussuseqannginneq pilersinneqassaaq aalisarnermik inuussutissarsiuteqarnermut ajoqutaasinnaasoq.

Taamaattumik Aningaasaqarnermut Ataatsimiititaliaq isumaqarpoq Naalakkersuisut siunissamut isigalutik qassutaarsiutinik piniutaarsiutinillu ingerlaavartumik qalluisarnissaq qularnaarniarlugu suliniutaasinnaasunik allanik isumaliuteqartariaqartut. Assersuutigalugu takorloorneqarsinnaavoq aqutsiveqarfimmi ataasiakkaani pisassinneqarneq qassutaarsiutinik nalunaaruteqartarnissamik

qalluisarnissamillu pisussaaffimmik ilaqartinneqartariaqartoq, taamaalillunilu pisassiissutit ilaat aatsaat aalisarneqarsinnaasassallutik qassutaarsiutit qallorneqareerpata. Periarfissatut allatit takorloorneqarsinnaavoq qassutaarsiutini pisatut naatsorsorneqartut pisasiissutinit tamanit ilanngaatigineqartalernissaat.

Ataatsimiititaliap ilanngullugu annertuumik isornartoqartippaa isummernissamat tunngavissiami oqaatigineqarmat kommune aningaasaqarnikkut ajornartorsiuteqalissasoq aalisartut pisortanit ikiorsiissuteqarnissaaq pissutigalugu isummernissamat tunngavissiaq manna akuerineqassanngikkaluarpat. Taamaattumik matumani erseqqissarneqartariaqarpoq kommune inatsisit naapertorlugit pisussaaffeqarmat innuttaasut kikkuugaluartulluunniit, aalisartut ilanngullugit, inuttut atugarisat pissutigalugit ikiortariaqalersut ikiornissaannut. Namminersorlutik Oqartussat pisussaaffiginnigilaat – pisussaaffigisinnaanagulu – kommunini isumaginninnermut aningaasartuutit killilersimaarneqarnissaat kisiat siunertaralugu kommunini ingerlatanut assigiinngitsunut tapiissuteqartarnissaaq. Ajornartorsiutit taamaattut Aningaasaqarnermut Ataatsimiititaliap aqqutigalugu ingerlaavartumik ilassutitut aningaasaliissuteqartarnikkut suliarineqartarsinnaanngillat, kommuninulli ataatsimoortumik tapiissutit pillugit naalakkersuinikkut isumaqatigiinniartarnerit aqqutigalugit suliarineqartariaqarlutik. Taamaattumik tunngaviusumik isigalugu qinnuteqaat manna kommunimut ataatsimoortumik tapiissutinik toqqaannangitsumik annikitsumik tapiinertut isigineqarsinnaaneruvoq aalisartunut aningaasaqarniarnikkut ikiorsiinertut pinnani.”

Aningaasaqarnermut Ataatsimiititaliap siuliani allassimasutut politikikkut isummernera qanoq malitseqartinneqarsimanersoq pillugu aappassaaneerinnermut akissuteqaamminni **nassuiaateqaqqullugit** Naalakkersuisut qinnuigineqarput.

11.12 Nanortalimmi atuartut inaannik pilersitsinnermut aningaasanik nuussineq (10-521)

Nanortalimmi atuartut inissaata nutaap pilersaarusiornissaanut aningaasanik atugassiinissaaq Aningaasaqarnermut Ataatsimiititaliamit ulloq 30. december 2010-mi akuersissutigineqarpoq.

Aningaasaliissuteqarnissamik suliassat 2010-mi kingusissukkat nassiunneqartut assigalugit suliamut uunga aamma tunngatillugu oqaatigineqartariaqarpoq aningaasat qinnutigineqartut Sanaartornermut Iluarsaanermullu Aningaasaateqarfimmi uninngatiinnarneqarsimanissaat ilimantarluinnarmat, tamannalu aningaasaateqarfimmit atuinissat piviusorsiortuunissaasa qulakkeerneqarnissaannik Aningaasaqarnermut Ataatsimiititaliap arlalippassuariarluni kaammattuutaanut akerliulluinnarpoq.

Ukiut arlarlissuit ingerlaneranni nalinginnaasumik isumaqartoqarsimavoq atuartut inaannik ingerlatsineq aserfallatsaaliinerlu kommunit suliassarigaat – naak nunatsinni atuartut inaasa arlalissuit pitsaannginnerat pissutigalugu suliassaq tamanna pisuni arlalinni kommuninit naammaginangilluinnartumik isumagineqarsimagaluartoq. Taamaalillunilu aturfik pillugu Inatsisartut peqqussutaanni nr. 8-mi, 21. maj 2002-meersumi § 33-mi allassimavoq atuartut angerlarsimaffissaannik inissaannillu pilersitsinissaaq kommunalbestyrelsit pisussaaffigigaat. Peqqussummi tassani § 47-mi allassimavoq aturfimmi sanaartornermut, atuartitsinnermut ulluinnarnilu ingerlatsinnermut aningaasartuutit tamaasa kommunit aningaasartuutigisassarigaat. § 48-mili allassimavoq kommunalbestyrelsit Naalakkersuisullu erseqqinnerusumik isumaqatigiissuteqarnerisigut suliassaqarfik kommuninut aatsaat nuunneqassasoq. Ikaarsaariarnermi aalajangersagaq taanna paasisat malillugit suliassaqarfik pillugu peqqussutaasimasumi 1997-imeersumi aalajangersarneqarpoq, maannali ukiut 14-it qaangiuttut paasisat malillugit suli isumaqatigiissuteqartoqarsimanngilaq.

Suliassaqarfik pillugu akisussaaffimmik agguataarinissap paasinarsisinneqarsimannginnera pitsaanngilluinnarpoq, tamannami ataasiinnarmik kinguneqarsinnaavoq; tassalu Namminersorlutik

Oqartussat kommunillu suliassaqarfimmu akisussaaffimmik naammassinninniarsimanginnerat. Suliassaqarfiup kommuninit tiguneqangajalersup aningaasartuuteqarfigineqarnissaanut Namminersorlutik Oqartussat kajumissuseqarsimangillat siunertamullu Namminersorlutik Oqartussat akisussaaffiata ataaniittut suli isigineqartumut kommunip sanaartornermut aningaasaliussaani atuinissaminut kommunit kajumissuseqanngillat. Tamatumani annaasaqartut tassaapput meeqqat inuusuttullu atuartut innaanni najugaqarsimasut.

Kommunit taamatullu Namminersorlutik Oqartussat aningaasarliornerat ajornartorsiutip tamatuma aaqiiviginissaanut iluaqutaangaarnaviangilaq. Suliassaqarfimmulli oqartussaassutsip ersernerlunnerata piaartumik aaqinneqarnissaanut Naalakkersuisut iliuseqartariaqartut Aningaasaqarnermut Ataatsimiititaliamit piumasarineqarpoq. Inatsisartummi siunertarisimangisaannarpaat ikaarsaariarnermut aalajangersagaq atuarfik pillugu peqqussummi § 48-miittoq atuutilersinneqanngisaannassoq. Allatut oqaatigalugu; atuartut inaannut akisussaaffik kommuninut nuunneqartariaqarpoq, tamatumalu kingorna angerlarsimaffiit pissusissaattut isumagineqarnissaannut aningaasanik taakku pingaarnersiuisariaqarlutik, taamaangippat atuartut inaasa angerlarsimaffiisalu naammaginartumik pitsaassuseqalersinneqarnissaannut aningaasaqarnikkut akisussaassutsip tamarmiusup tigunissaa siunertaralugu atuarfik pillugu peqqussummi § 48 Naalakkersuisut atorunnaarsinngikkuniku allanngortittariaqarpat.

Suliaq pillugu nassuiaat itisilerutaasoq pisariaqartinneqartoq suliap 10-521-ip 30. december 2010-mi aalajangiiffiginerani Aningaasaqarnermut Ataatsimiititaliap oqaatigaa. Tamatuma saniatigut nunatsinni atuartut ineqarfiisa nutarterneqarlutillu annertusarneqarnissaannut najoqqutassat malinneqarsimasutut naatsorsuutigineqartut nassuiaateqarfigineqarnissaat ataatsimiititaliamit kissaatigineqarpoq. Nassuiaat ataatsimiititaliamit ulloq manna suli tiguneqarsimangilaq. Suliap killiffia aappassaaneerinissamut akisuteqaamminni nassuiaatigeqqullugu Naalakkersuisut qinnuigineqarput.

12. Aningaasaqarnermut Ataatsimiititaliap kaammattuutai

2010-mi ilassutitut aningaasaliissutitut inatsisissatut siunnersuummik kiisalu Naalakkersuisut aningaasaliissutitut allannguutissatut siunnersuutaannik sularinninnermini taakkunangalu malitseqartitsisarnermit misilittakkani tunngavigalugit Naalakkersuisunut **kaammattuutinik** arlalinnik ukuninnga saqqummiussinissaminut Aningaasaqarnermut Ataatsimiititaliap pissutissaqarsorivoq:

Kaammattuut nr. 1

Kingumut atuutilersussanngorlugit nuussinissat malittarisassatut pingaarnertut isigalugu akuersissutigineqartannginnissaannik Aningaasaqarnermut Naalakkersuisoq Aningaasaqarnermut Ataatsimiititaliamit **kaammattorneqarpoq**. Aningaasaliissutinik allannguinissamik akuersissuteqartoqassatillugu aningaasat atorneqareerneranni akuersissuteqannginnissaq pinerit tamaasa qulakkeerneqartariaqarpoq.

Kaammattuut nr. 2

Missingersuutinik qaangiinissaq pinngitsoorneqarsinnaanngitsoq erseqqitsillugu nunatta karsiata naatsorsuutaasa kusassarneqarnissaat siunertariinnarlugu ukiumi aningaasanut inatsisit atuuffiata naalernerani nuussinerit ingerlanneqartannginnissaannik Naalakkersuisut Aningaasaqarnermut Ataatsimiititaliamit **kaammattorneqarput**. Taamaattoqartillugu aningaasaliissutinik nuussisnaatitaanerminnik Naalakkersuisut atuinngitsoorluarsinnaapput, tassungalu taarsiullugu

nuussinissamik qinnuteqaammik Aningaasaqarnermut Ataatsimiititaliamut saqqummiussillutik. Tassunga taarsiullugu missingersuutitik qaangiinnermut pissutaasoq nunatta karsiata naatsorsuutaanut atatillugu naatsorsuutitut nassuiaatini ersarissarneqarsinnaavoq.

Kaammattuut nr. 3

Aningaasat Sanaartugassanut Iluarsagassanullu Aningaasaateqarfimmi atorneqaratik uninngaannartussaasut ilisimagaluarlugu aningaasanik qinnuteqartoqartaqqunagu sanaartugassanut aningaasaliissutitik atuinissamik **piviusorsioortumik** missingersuusiortarnissamik qulakkeerinninniarnerminnik Naalakkersuisut ingerlatsiinnarnissaat Aningaasaqarnermut Ataatsimiititaliamit **kaammattuutigineqarpoq**.

Kaammattuut nr. 4

Isummernissamut tunngavissiat Aningaasaqarnermut Ataatsimiititaliamit suliarineqartussat Aningaasaqarnermut Naalakkersuisoqarfimmut tusarniaassutigineqarsimangitsut sulianut arlalinnut tunngatillugu Aningaasaqarnermut Ataatsimiititaliamit paasineqarpoq, naak missingersuusiortnermut malittarisassami 2008-meersumi allassimasoq isummernissamut tunngavissiat Aningaasaqarnermut Naalakkersuisoqarfimmut tusarniaassutigineqassasut aammalu tusarniaanermut akissutit isummernissamut tunngavissiamut ilanngunneqassut. Tamatuma saniatigut ilassutitut aningaasaliissutitut inatsimmi *missingersuutitut ilanngussat* aningaasaliissutitik allangortitsinermit tunuliaqutaasumik nassuiaatitut ilassutitut aningaasaliissummi kisimik uppernarsaatitut ilanngunneqartarmata, missingersuutitut ilanngussat tamatuma kingorna Inatsisartunit innuttaasunillu, Naalakkersuisut isummernissaannut tunngavissianik ikorfartorneqaratik, atuarneqarlutillu paasineqarsinnaasuunissaat Aningaasaqarnermut Ataatsimiititaliamit assut pingaartinneqarpoq. Naalakkersuisut missingersuusiortnermut malittarisassiaanni allassimasut ulluinnarni malinneqartartuuppata missingersuutitut ilanngussat naammaginaruusimassagunaraluarput, taamaattumik missingersuusiortnermut malittarisassami aalajangersakkanik malinninnissamik Naalakkersuisut Aningaasaqarnermut Ataatsimiititaliamit **kaammattorneqassapput**.

Kaammattuut nr. 5

2011-mut Sanaartornermut Iluarsaanermullu Aningaasaateqarfik pillugu nassuiaat aallarnerfigalugu nassuiaatip Inatsisartut 2012-imi upernaakkut ataatsimiinnissaannut naammassinissaa aammalu Inatsisartuni oqaluuserisassatut piffissaagallartillugu nalunaarutigineqarnissaa Naalakkersuisunit anguniarneqassasoq Aningaasaqarnermut Ataatsimiititaliamit **kaammattuutigineqarpoq**.

13. Aningaasaqarnermut Ataatsimiititaliap inassuteqaatai

Paasinnineq isumaliutissiisummi allaqqasoq aammalu nangaassutit naatsorsuutigisallu isumaliutissiisummi taaneqartut naapertorlugit inatsisissatut siunnersuut akuersissutigineqassasoq Aningaasaqarnermut Ataatsimiititaliap isumaqatigiittup inassutigaa.

Taama oqaaseqarluni Inatsisartut Aningaasaqarnermut Ataatsimiititaliaata Inatsisartut 2010-mi ilassutitut aningaasaliissutitut inatsisissaattut siunnersuut aappassaaniigassanngortippaa.

Olga P. Berthelsen,

Andreas Uldum

siulittaasoq

Finn Karlsen

Per Berthelsen

Juliane Henningsen